

Ch L 9297.74

3

HARVARD COLLEGE LIBRARY  
FROM THE  
HARVARD-YENCHING  
INSTITUTE

OCT 1 1928

~~Ch L 9301.74~~

~~Ch L 9297.74~~

Ch L<sup>R</sup> 9297/1184

册府元龜



淮南李嗣京叅閱

西極文翔鳳訂正

豫章黃國琦較釋

帝王部

總序

昔維出書九章聖人則之以為世大法其初一日五行一曰水二曰火三曰木四曰金五曰土帝王之起必承其王氣大古之世鴻荒朴畧不可得而詳焉庖犧氏之王天下也繼天之統為百王先實承木德以

建大號三墳所紀允居其首蓋五精之運以相生爲德木生火火生土土生金金生水水生木乘時迭王以昭統緒故創業受命之至必推本乎曆數參考乎徵應稽其行次上承天統春秋之大居正貴其體元而建極也前志之論閏位謂其非次而不當也其工氏任智刑以御九域霸而不王雖承太昊之後而不齒五德之序神農氏以火承木故爲炎帝軒轅有土德之瑞故號黃帝少昊以金德王故號曰金天氏顓頊以水德王號曰高陽氏帝嚳以木德王號曰高辛氏帝堯以火德王號曰陶唐氏帝舜以土德王號曰

有虞氏繇虞氏以上皆承運更起應期正位參列五辰之次而克當統紀至於正朔服色之改度戎祀朝會之所尚記籍斯逸罕得而述焉夏后氏受有虞之禪是謂金德正用建寅其色尚黑商湯代夏以水德王正用建丑其色尚白周武以木德王正用建子其色尚赤三代之際各居一統錯綜其數以通其變順三微之序極三才之致咸享祚長久蓋得夫天曆之正也三季之衰秦兼天下獨推五勝不當正統漢祖以斷蛇之符上繫成周是爲火德起自沛中旗幟皆赤至文帝時魯人公孫臣推終始之傳謂漢承秦當

用土德土德之應黃龍當見宜改正朔服色尚黃時  
丞相張蒼引河決金隄以爲漢當水德以十月爲正  
其色外黑內赤遂罷公孫臣之議明年黃龍見成紀  
乃用土行改曆服色而賈誼亦以爲然孝武正曆以  
正月爲歲首色尚黃數用五蓋以秦爲水德據漢土  
而克之從所不勝遂順黃德劉向父子以爲帝出乎  
震故庖犧氏姓受木德以母傳子終而復始自農軒  
歷唐虞三代漢得火行上合天統當時雖建厥議未  
克遵行世祖中興乃用其說魏氏始基有黃星之應  
又太史丞許芝言戊寅黃龍見此受命之符最著明

者也又易運期讖有黃氣授真人出之言又太微中  
黃帝坐嘗明赤帝坐嘗不見以爲黃家興而赤家衰  
亡之漸又熒惑失色十有餘年蘇林董巴等又言魏  
之氏族出自顓頊與舜同祖舜以土德承堯之火今  
魏亦以土德承漢之火於行運合於堯舜授受之次  
旣而受漢禪改元黃初議更正朔易服色殊徽號同  
律度量以乘土行以夏數爲得天卽用夏正而服色  
尚黃然尚循漢正朔弗之改也明帝在東宮著論以  
爲五帝三王雖同氣其祖祖不相襲正朔自宜改變  
以明受命之運卽位久之從高堂隆之議乃推三統

之次以魏得地統遂用建丑之月為正月服色尚青  
 犧牲用白戎事乘黑首白馬建大赤之旂朝會建大  
 白之旂齊王嗣位以夏正得天改用建寅為正月晉  
 武泰始二年有司舉唐堯舜禹不易祚改制至於湯  
 武始推行數今晉繼三皇舜禹之迹應天受禪宜用  
 前代正朔服色如虞遵唐故事而史臣之記晉為金  
 行服色尚赤後魏道武天興初始詔有司議定行次  
 有司曰國家繼黃帝之後宜為土德有土畜之端及  
 黃星之符遂從土德服色尚黃數用五犧牲用白行  
 夏之正孝文太和中下詔以丘澤初制配尚宜定五

德相襲論有異嘗帝令百辟集議高閭以為漢用火  
 德徵斬蛇之符上繼於周棄秦之暴越惡承善不以  
 世次為正自時厥後乃以為嘗魏承漢火生土故魏  
 為土德晉承魏土生金故晉為金德趙承晉金生水  
 故趙為水德燕承趙水生木故燕為木德秦承燕木  
 生火故秦為火德今魏宜承秦為土德李彪崔光等  
 以為宜紹晉金德不當次於僭偽建議各殊稱年不  
 定既而穆亮等大臣其議宜上承晉世定為水德孝  
 文下詔特從其說後周革命有赤雀之祥群臣奏議  
 請更正朔定為木行以承水德服色尚烏隋文受禪

次用火德以有赤光之瑞車服旌旗悉皆尚赤而帝服戎服悉皆以黃唐氏承統盛德在土至開元中有請改爲金德者終報罷之天寶中令諸衛緋色幡改爲赤黃色以應土德朱梁建國如秦之暴雖宅中夏不當正位同光續服再承絕緒晉承唐後是爲金德漢氏承晉實當水行周祖卽位之初有司定爲木德自伏羲氏以木王終始之傳循環五周至於皇朝以炎靈受命赤精應讖乘火德而王混一區夏宅土中而臨萬國得天統之正序矣凡帝王部一百二十八門

帝系

夫結繩之初朴畧茫昧莫獲而詳書契之後辨姓授氏可得而記太昊之前譜牒蓋闕帝鴻之後世緒具存司馬遷著之史記以存系表明乎受天命膺帝期者蓋以祖宗實有茂德所以後世承乎發祥若乃后稷播植周室於是隆興唐堯文思漢緒繇其增盛蓋瓜瓞之相屬故蘿圖而有融魏晉以還方冊可考罔不緬藉先烈誕啓丕圖若乃累積之懿傳繼之盛蓋繇德有厚薄源有淺深憑舊烈者蕃衍無世資者衰替今竝考舊史披帝錄詳究初終率用論次俾有條

而不紊庶百世而可知矣

太昊庖犧氏風姓母曰華胥作網罟以畋漁取犧牲

故天下號曰庖犧氏一云取犧牲以充庖厨故曰庖犧氏是為犧皇後世音謬謂之

伏犧或謂之宓犧一號皇雄氏繼天而王故曰帝太昊庖犧

氏沒女媧氏立為女皇一云女帝亦風姓承庖犧制度女

媧氏沒次有大庭氏柏皇氏中央氏栗陸氏驪連氏

赫胥氏尊盧氏渾沌氏昊英氏有巢氏朱襄氏葛天

氏陰康氏無懷氏凡十五世皆襲庖犧之號

炎帝神農氏姜姓母曰任已有螭氏女為少典妃生

帝以火承木故為炎帝一云南方生夏教民耕農故天下號

曰神農氏一云農皇或云帝炎本起烈山氏或桐之一號魑隗

氏納奔水氏女曰聽談生帝臨魁次帝承次帝明次

帝直次帝釐次帝稟次帝榆罔自炎帝至榆罔凡八

世

黃帝軒轅氏少典之子有熊國君少典之子姓公孫一云姬姓母曰

附寶居軒轅之丘因以為名一云有軒冕之服故有

土德之瑞故號黃帝一號帝鴻氏亦曰歸藏氏在位百年

年百一十歲或云壽三百歲

少昊金天氏黃帝之子黃帝娶西陵之女是為嫫祖

一作為正妃生二子其一曰玄囂是為青陽降居江

水即少昊也邑于窮桑以登帝位故謂之窮桑帝以  
金承土故天下號曰金天氏金主西方秋故曰少昊在位百年

一云八十四年

顓頊高陽氏姬姓黃帝之孫昌意之子昌意娶蜀山

氏女曰昌僕

謂之女樞

生帝以水承金天下號曰高陽氏

在位七十八年年九十八歲

帝嚳高辛氏姬姓黃帝之曾孫父曰蟠極蟠極父曰

玄囂帝於顓頊為族子

其母不見

以水承木天下號曰高

辛氏在位七十五年年五百歲

一云生十五而佐顓頊三十登帝位

帝堯陶唐氏伊祁姓帝嚳之子帝嚳娶陳鋒氏生放

勛姬訾氏生摯

一云帝嚳納四妃有台氏女曰姜嫄生后稷次有娥氏女曰簡狄生契次

陳鋒氏女曰慶都生放勛次姬訾氏女生摯

摯於兄弟最長即位封放勛

為唐侯摯在位一年而放勛立是為堯帝以火承木

天下號曰陶唐氏在位九十八年年百一十八歲

帝舜有虞氏姚姓父曰瞽叟瞽叟父曰橋牛橋牛父

曰句望句望父曰敬康敬康父曰窮蟬窮蟬父曰帝

顓頊顓頊父曰昌意以至舜七世矣自窮蟬以至帝

舜皆微為庶人堯禮舜以天下以土承火天下號曰

有虞氏始舜生三十徵庸

言其始見試用三十在位

歷試二年攝政

二十八年五十載陟方乃死

方道也舜即位五十年升道南方巡狩死於蒼梧之野而



葬年百一十二歲通服堯喪三年也一云舜年二十  
行天子事年六十一代堯以孝聞年三十堯舉之年五十稱  
踐帝位三十九年年百歲

禹夏后氏姒姓父曰鯀鯀之父曰帝顓頊顓頊之父  
曰昌意昌意之父曰黃帝禹者黃帝之玄孫而帝顓

頊之孫也禹之曾大父昌意及父鯀皆不得在帝位  
為人臣舜禮禹以天下以金承土天下號曰夏后氏

禹年八十六攝行天子事五年年九十餘舜喪明年  
即真年百歲禹娶塗山氏之女生啓在位九年啓生

太康在位二十九年太康弟仲康在位十三年仲康  
生相一名相安在位二十八年相遺腹子母有仍氏之女

生少康在位二十一年少康生宁一作杼又作李  
位十七年宁生槐一作莽一作魁在位二十六年槐生

芒一云荒和在位十八年芒生泄一云泄宗在位十六年  
泄生不降或曰江成在位五十九年不降弟扃一作扃又

陽高在位二十一年扃生厘一作厘或在位二十年不  
降生孔甲在位三十一年孔甲生皐一名皐苗在位十一

年皐生發一名后敬在位十一年發生履癸是為桀  
謚法賊人或曰發惠在位五十三年為湯所滅禹自戊戌歲建

多殺曰桀在位五十七年通羿浞國盡巳酉十五  
代十七王通羿浞四百三十二年  
殷湯子姓其先契母曰簡狄有娥氏之女有娥在不

為帝嚳次妃三人行浴見玄鳥墮其卵簡狄取吞之  
因孕生契契長而佐禹治水有功帝舜乃命契曰百  
姓不親五品不遜汝為司徒敬敷五教在寬封於商

商今在維賜姓子氏 祖以玄鳥生子也契興於唐虞大禹之

際功業著於百姓百姓以平契生昭明昭明生相土

相土就契封於商一云相土生昌若 一云昌若生曹

闕伯居商丘相土因之曹圉生冥 冥為司空勤其官事冥生振振生

微微生報丁報丁生報乙報乙生報丙報丙生壬

壬生壬癸壬癸之妃曰扶都生天乙 以乙是為成

湯自契至湯十四世湯踐天子位十三年年百歲太

子太丁未立而卒於是廼立太丁之弟外丙在位三

年外丙弟仲壬在位四年仲壬兄太丁之子太甲在

位十四年年百歲太甲生沃丁在位三十年 一云二十九

沃丁生太康在位二十五年太康生小甲 一云在位

十七年 一云三十小甲弟雍巳在位十二年雍巳弟太

戊在位一十五年大戊生仲丁在位十一年 一云十

仲丁弟外壬在位十五年外壬弟河亶甲在位九年

河亶甲生祖乙在位十九年祖乙生祖辛在位十六

年祖辛弟沃甲 一云在位二十五年沃甲兄祖辛之

子祖丁在位三十二年祖丁弟沃甲之子南庚在位

二十九年祖丁之子陽甲在位有七年陽甲弟盤庚  
在位二十八年盤庚弟小辛在位二十一年小辛弟小

乙在位二十年一云二十一年小乙生武丁在位五十九年

年百歲武丁生祖康在位七年祖康弟祖甲在位三十

三年祖甲生廩辛一云馮辛在位六年廩辛弟康丁在位

二十一年康丁生武乙在位四年武乙生太丁一名文丁在位

三年太丁生帝乙在位三十七年帝乙生受辛天下謂之紂

謚法殘義在位三十二年湯自乙未歲建國盡戊寅

損善曰紂百四十五年

周文王姬姓其先后稷名棄其母有部氏女曰姜嫄

姜姓嫄字姜嫄為帝嚳元妃姜嫄出野見巨人跡心

欣然說欲踐之踐之而身動如孕者居期而生子以

為不祥棄之隘巷馬牛過者皆辟不踐徒置之林中

適會山林多人遷之而棄渠中冰上飛鳥以其翼覆

薦之姜嫄以為神遂收養之初欲棄之因名曰棄棄

為兒時忤如巨人之志其遊戲好種樹麻菽麥及為

成人遂好耕農相地之宜宜穀者稼穡焉民皆法則

之帝堯聞之舉棄為農師天下得其利有功帝舜曰

棄黎民始饑一云祖饑爾后稷播時百穀封棄於部

今釐鄉號曰后稷別姓姬氏后稷之興在陶唐虞夏

在扶風帝王部

之際皆有令德后稷生不窳不窳末年夏后氏政衰  
 去稷不務而不窳以失其官而奔戎狄不窳生鞠鞠  
 生公劉公劉雖在戎狄之間復修后稷之業務耕種  
 行地宜自漆沮渡渭取財用行者有資居者有畜積  
 民賴其慶百姓懷之多徙而保歸焉周道之興自此  
 始故詩人歌樂思其德公劉卒慶節立國於豳新平  
漆縣  
 之東北有豳亭慶節生皇僕皇僕生姜弗姜弗生毀隄一作  
體隄  
 毀隄生公非公非生高圉高圉能率稷者  
也周人報之高圉生亞  
 圉亞圉生公叔祖類公叔祖類生古公亶父復修后  
 稷公劉之業積德行義國人皆戴之獯鬻戎狄攻之

欲得財物與之已復攻之欲得地與民民皆怒欲戰  
 古公曰有民立君將以利之今戎狄所為攻戰以吾  
 地與民民之在我與其在彼何異民欲以我故戰殺  
 人父子而君之予不忍為乃與私屬遂去豳渡漆沮  
 水在杜陽岐山杜陽縣在扶風踰梁山止於岐下山在扶風美陽西  
北其南有周原始  
 改國曰周日周幽人舉國扶老携弱盡復歸古公於岐下及他  
 旁國聞古公仁亦多歸之於是古公乃貶戎狄之俗  
 而營築城郭室屋而邑別居之分別而為  
邑落也作五官有  
 司天子之五官曰司徒司馬司空  
士司寇典司五眾此殷時制也民皆歌樂之頌  
 其德古公有長子曰秦伯次日虞仲太姜生少子季

歷季歷娶太任太姜有邠氏之女大任摯任氏之中女皆賢婦人生昌

有聖瑞古公曰我當有興者其在昌乎長子泰伯虞

仲知古公欲立季歷以傳昌二人乃亡如荆蠻文身

斷髮嘗在水中故斷其髮文其身以象龍子故不見傷害以讓季歷季歷立是

為公季公季脩古公遺道篤於行義諸侯順之公季

卒子昌立是為西伯西伯曰文王遵后稷公劉之業

則古公公季之法始自岐下徙都豐詩人道西伯蓋

受命之年稱王而斷虞芮之訟虞在河東太陽縣芮在馮翊臨晉縣在

位五十年太子發立是為武王在位七年武王生成

王在位三十七年成王生康王在位二十六年康王

生昭王在位五十一年昭王生穆王在位五十五年

年百四歲穆王生恭王在位十二年恭王生懿王在

位二十五年恭王弟孝王在位十五年懿王太子夷

王在位十六年夷王生厲王在位三十七年厲王生

宣王在位四十六年宣王生幽王在位十一年幽王

生平王在位五十一年平王生太子洩父蚤死立其

子是為桓王在位二十三年桓王生莊王在位十五

年莊王生釐王在位五年釐王生惠王在位二十五

年惠王生襄王在位二十三年襄王生頃王在位六

年頃王生匡王在位六年匡王弟定王在位二十一

年定王生簡王在位十四年簡王生靈王在位二十  
 七年靈王生景王在位二十五年景王生悼王在位  
 一年悼王弟敬王在位四十四年敬王生元王在位  
 七年元王生貞定王在位二十八年貞定王生哀王  
 在位九十日哀王弟思王在位百五十日思王弟考  
 王一云考哲王在位十五年考王生威烈王在位二十四  
 年威烈王生安王一作元安又作原安在位二十六年安王生  
 烈王夷烈作在位七年烈王弟顯王一作顯聖在位四十八  
 年顯王生慎靚王一作順靖在位六年慎靚王生赧王在  
 位五十年周自武王巳卯歲建國至赧王三十  
一代三十七王共八百六十七年

漢高祖沛豐邑中陽里人姓劉氏母媪史失其姓其先劉

累學擾龍事孔甲范氏其後也晉大夫范宣子曰祖

自虞以上為陶唐氏在夏為御龍氏即劉累也在商為豕

韋氏國名在東郡白馬縣東南在周為唐杜氏二國名唐太原晉陽縣杜京兆杜縣

晉主夏盟為范氏范氏為晉士師言晉為霸王魯文

公世奔秦後歸於晉其處者為劉氏劉向云戰國時

劉氏自秦奔於魏秦滅魏遷大梁都於豐故周氏說

雍齒曰豐故梁地也高祖本系出自唐帝降及於周

在秦作劉涉魏而東遂為豐公豐公蓋六上皇父其

遷日淺墳墓在豐鮮焉及高祖即位置祠祀官則有

秦晉梁荆之筮世祠天地綴之以祀綴言不絕也高祖初

封漢王五年平項籍即皇帝位在位通為王十二年

年六十二太子立是為惠帝帝呂后之子在位七年

高祖中子女帝立母曰薄太后在位二十三年年四

十七太子立是為景帝母曰竇皇后在位十六年年

四十八中子武帝立母曰王美人在位五十四年年

六十九少子昭帝立母曰趙婕妤在位十三年年二

十六無子立武帝孫昌邑王賀父曰昌邑哀王驁在

位二十七日立武帝衛太子之孫史皇孫之子是為

宣帝母曰王翁須在位二十五年年四十三太子立

是為元帝母曰恭哀許皇后在位十六年年四十三

太子立是為成帝母曰王皇后在位二十六年年四

十六無子立元帝庶孫定陶恭王子是為哀帝母曰

丁姬在位六年年二十六無子立元帝庶孫中山孝

王子是為平帝母曰衛姬在位五年年四十無子王

莽立宣帝玄孫孺子即位始生二歲孺子父題祖勳

皆為廣戚侯曾祖楚孝王囂宣帝子也在位四年為

王莽所滅莽死平陵方望復立孺子為帝數月遇害

年二十二漢自高祖乙未歲建國至孺子  
已巳凡十代十五帝二百一十一年

後漢光武南陽蔡陽縣人南陽郡今鄧州縣也蔡陽  
縣故城在隨州棗陽縣西

南高祖九世之孫也出自景帝生長沙定王發長沙縣今

潭州縣發生春陵節侯買春陵鄉名本屬零陵元帝特徙南陽仍號春陵故城今在

隨州縣東買生鬱林太守外外生鉅鹿都尉回鉅鹿郡在邢州

縣也都尉本郡尉秦官也掌佐守典武職秩比二千石景帝更名都尉回生南頓令欽

南頓縣屬汝南郡故城在今陳州頓城縣西欽生光武母曰聞都南陽樊

重之女王莽末與更始舉義兵興復長安更始為赤

眉所破光武即皇帝位平赤眉在位三十三年年六

十二太子立是為明帝母曰陰皇后在位十八年年

四十八太子立是為章帝母曰賈貴人在位十三年

年三十一第四子立是為和帝母曰梁貴人在位十

七年年三十二少子立是為殤帝母曰鄧皇后立百

七十年年二歲章帝孫清河孝王子立是為安帝母

曰左姬在位一十九年年三十二章帝孫濟北王子

北鄉侯立二百七十日安帝廢太子濟陰王立是為

順帝母曰李氏在位十九年年三十太子立是為冲

帝母曰虞貴人在位一年年三歲章帝玄孫千乘貞

王曾孫樂安夷王孫渤海孝王子立是為質帝母曰

陳夫人在位一年年九歲章帝曾孫河間孝王孫蠡

吾侯子立是為桓帝母曰閔氏在位二十一年年三

十六章帝玄孫河間孝王曾孫解瀆亭侯孫立是為

十五



靈帝母曰董夫人在位二十二年年三十四子弘農

王立 在位百三十八日王弟陳留王立是為獻帝母

曰王美人在位三十一年年四十禪於魏魏文帝封

為山陽公明帝青龍二年薨年五十四 後漢自光武  
乙酉歲至獻

帝康子凡八代十四  
帝共一百九十六年

魏太祖姓曹氏漢相參之後其先出於黃帝當高陽

世陸終之子曰安是為曹姓周武王克殷存先世之

後封曹快於邾春秋之世與於盟會遠至戰國為楚

所滅子孫分流或家於沛漢祖之起曹參以功封平

陽侯世襲爵土絕而復紹桓帝世曹騰為中嘗侍大

長秋封費亭侯養子嵩嗣官至太尉莫能審其生出

本末 一云嵩夏侯氏之子悼之叔  
父太祖於悼為從父兄弟 嵩生太祖仕漢為

丞相封魏王建安二十五年薨年六十六太子嗣丞

相位魏王其年受漢禪是為文帝母曰卞皇后在位

七年年四十太子立是為明帝母曰文昭甄皇后在

位十四年年三十六無子養子齊王為太子 宮省事  
祕莫有

知其所  
繇來者 在位十五年為司馬景王所廢年二十三文

帝孫東海定王子高貴鄉公立在位七年年二十太

祖孫燕王字子嘗道鄉公立在位七年年二十禪於

晉武帝封為陳留王薨年五十六 魏自文帝康子歲  
至陳留王乙酉歲

凡四代五帝  
四十六年

晉宣帝河內溫縣孝敬里人姓司馬氏其先出自帝  
 高陽之子重黎為夏官祝融歷唐虞夏商世序其職  
 及周以夏官為司馬其後程伯休父周宣王時以世  
 官克平徐方錫以官族因而為氏楚漢間司馬邛為  
 趙將與諸侯伐秦秦亡立為殷王都河內漢以其地  
 為郡子孫遂家焉自邛八世生征西將軍鈞字叔平  
 約生豫州太守量字公度量生潁川太守雋字元異  
 雋生京兆尹防字達公帝即防之第二子也仕魏為  
 太傅都督中外諸軍錄尚書事加相國封安平郡公

固讓嘉平三年薨年七十三追謚宣帝世子以撫軍  
 大將軍輔政母曰宣穆張皇后明年遷大將軍加侍  
 中都督中外諸軍事錄尚書事累加相國固辭正元  
 二年薨年四十八追謚景帝母弟繼為大將軍加侍  
 中都督中外諸軍錄尚書事輔政累加相國封晉王  
 咸熙二年薨年五十五追謚文帝世子嗣相國晉王  
 位母曰文明皇后其年受魏禪是為武帝在位二十  
 六年年五十五太子立是為惠帝母曰武元楊皇后  
 在位十六年年四十八皇太弟武帝第二十五子立  
 是為懷帝母曰王太妃在位七年年三十武帝孫吳

孝王晏子出繼秦王立是為愍帝在位五年年十八  
 為劉聰所害宣帝曾孫瑯琊恭王觀之子立為晉王  
 明年即皇帝位是為東晉元帝母曰夏侯太妃在位  
 五年年四十七太子立是為明帝母曰豫章郡君荀  
 氏在位三年年二十七太子立是為成帝母曰明穆  
 庾皇后在位十七年年二十二母弟瑯琊王立是為  
 康帝在位二年年二十三太子立是為穆帝母曰康  
 獻褚皇后在位十七年年十九成帝長子瑯琊王立  
 是為哀帝母曰章太妃在位四年年二十五母弟瑯  
 琊王立在位六年大司馬桓温廢為海西縣公大元

十一年薨年四十五元帝少子瑯琊王立是為簡文  
 帝母曰簡文宣鄭太后在位二年年五十三太子立  
 是為孝武帝母曰孝武李太后在位二十四年年三  
 十五太子立是為安帝母曰安德陳太后在位二十  
 二年年三十七母弟大司馬瑯琊王立是為恭帝在  
 位二年禪於宋其年遇害年三十六  
晉自武帝乙酉  
 歲至恭帝庚申  
 凡七世十五帝  
 一百五十六年

後魏道武姓拓跋氏其先出自黃帝黃帝有子二十  
 五人或內列諸華或外分一服昌意少子受封北土  
 國有大鮮卑山因以為號其後世為君長統幽都之

北廣漠之野畜牧遷徙射獵爲業淳樸爲俗簡易爲化不爲文字刻木紀契而已世事遠近人相傳授如史官之紀錄焉黃帝以土德王北俗謂土爲拓謂后爲跋故以爲氏其裔始均入仕堯世逐女魃於弱水之北民賴其勤帝舜嘉之命爲田祖爰歷三代以及秦漢獯鬻獫狁戎匈奴之屬累代殘暴作害中州而始均之裔不交南夏是以載籍無聞焉積六十七世至成皇帝屯立聰明武畧遠近所推統國三十六大姓九十九威振北方莫不率服其後有節帝貸莊帝觀明帝樓安帝越宣帝推寅於是南遷大澤方千餘里厥土昏冥沕沮又有景帝利元帝侯和帝肆定帝機僖帝蓋威帝僖獻帝時有神人言於國曰此土荒遐未足以建都邑宐復徙居獻帝年時衰老乃以位授子聖武帝詰汾獻帝命令南移山谷高深九難八阻於是欲止有神獸其形似馬其聲類牛先行導引歷年乃出始居匈奴之故地其遷徙策畧多出宣獻二帝故時人竝號曰推寅蓋俗云鑽有處義初聖武帝嘗率數萬騎田於山澤欵見輜輶自天而下旣至見美婦人侍衛甚盛帝異而問之對曰我天女也受命相偶遂同寢宿旦請還曰明年周時復會此

處言終而別去如風雨及期帝至先所田處果復相見天女以所生男授帝曰此君之子也善養視之子孫相承當世爲帝王語訖而去子卽始祖神元力微也故時人諺云詰汾皇帝無婦家力微皇帝無舅家神元生而英睿元年歲在庚子先是西部內侵國民離散依於沒鹿迴部大人竇竇始祖有雄傑之度時人莫測後與竇攻西部竇軍敗失馬步走始祖使人以所乘駿馬給之竇歸令其部內求與馬之人當加重賞始祖隱而不言久之竇乃知大驚將分國之半以奉始祖始祖不受乃進其愛女竇猶思報恩故問

所欲始祖請率所部北居長川竇乃敬從積十數歲德威大洽諸舊部民感來歸服二十九年竇臨終戒其二子使謹奉始祖其子不從乃陰謀爲逆始祖召殺之盡弁其衆諸部大人悉皆款服控弦上馬二十餘萬三十九年遷於定襄之盛樂四月祭天諸部君長皆來助祭唯白部大人觀望不至於是徵而戮之遠近肅然莫不震懾始祖乃告諸大人曰我歷觀前世匈奴蹋頓之徒苟貪財利抄掠邊民雖有所得而其死傷不足相補更招寇讐百姓塗炭非長計也於是與魏相親神元饗國五十八年年百四歲子章帝

悉鹿立諸部離叛國內紛擾饗國九年弟平帝綽立

雄武有謀略威德復舉饗國七年神元孫

太子追謚文帝沙漠

汗之子

惠帝弗立聰哲大度爲諸父兄所重政崇寬簡

百姓懷服饗國一年神元子昭帝祿官立分國爲三部帝自以一部居東在上谷北濡源之西東接宇文部以文帝之長子栢帝猗屯統一部居代郡之參合陂北以栢帝弟穆帝猗盧統一部居定襄之盛樂故城自始祖以來與晉和好百姓乂安財畜富實控弦騎士四十餘萬昭帝統部十三年穆帝天資英特勇畧過人遂總攝三部爲一統三年白部大人叛入西

河鐵木劉虎舉衆於鴈門應之攻晉新興鴈門三郡并州刺史劉琨來乞師帝使弟子平文皇帝率騎二萬助琨擊之大破白部次攻劉虎屠其營落虎收其餘燼西走渡河竄居朔方晉懷帝進帝大單于封代公帝以封邑去國懸遠民不相接乃從琨求句注陁北之地琨自以託附聞之大喜乃徙馬邑陰館樓煩繁峙崞五縣之民於陁南更立城邑盡獻其地東接代郡西連西河朔方方數百里帝乃徙十萬家以充之八年晉愍帝爲代王置官屬食代恒山二郡帝饗國九年子晉根立月餘而薨晉根子始生栢帝后立

之其冬晉根子又薨思帝子平文帝鬱律立姿質雄壯甚有威畧元年歲在丁丑二年劉虎據朔方來侵西部帝逆擊大破之虎單騎逃走其從弟路孤率部落內附帝以女妻之西兼烏孫故地東吞勿吉以西控弦上馬將有百萬饗國五年栢帝中子惠帝賀儇立以五年爲元年政事太后臨朝四年帝始臨朝以諸部人情未悉款順乃築城於東木狼山徙都之饗國五年弟煬帝紇那立五年出居於宇文部賀蘭及諸部大人共立平文帝長子翳槐是爲烈帝三年石虎遣將李穆率騎五千納烈帝於大寧國人六千餘落叛煬帝煬帝出居於慕容部烈帝復位以三年爲後元寧城新盛樂城在城東南十里是年平文帝次子昭成帝什翼捷立帝生而奇偉寬仁大度喜怒不形于色身長八尺隆準龍顏立髮委地臥則乳垂至席烈帝顧命使弟彌自詣鄴奉迎卽位於繁峙之北時年十九稱建國元年二年春始置百官分掌衆職三年春移都於雲中之盛樂宮饗國二十九年爲苻堅所破國衆離散堅使劉庫仁劉衛辰攝國事七年堅敗于淮南慕容文等殺庫仁庫仁弟眷攝國事九年庫仁子顯殺眷而代之明年昭成嫡孫卽位於牛

川建元登國凡九年又改皇始凡二年又改天興是  
年卽皇帝位改國號魏遷都平城是爲道武皇帝父  
曰獻明皇帝母曰獻明賀皇后并追尊成帝已下及  
后號謚道武在位十四年年三十九長子相國大將  
軍齊王立是爲明元帝母曰劉貴人在位十五年年  
三十二長子太平王監國是爲大武帝母曰密社皇  
后在位二十九年年四十五嫡孫立是爲文成帝父  
曰景穆皇帝母曰宮閭皇后在位十四年年二十六  
太子立是爲獻文帝母曰李貴人在位六年傳國於  
太子是爲孝文帝年二十二孝文母曰李夫人在位  
二十九年改國姓曰元氏年三十三太子立是爲宣  
武帝母曰高夫人在位十六年年三十三太子立是  
爲孝明帝母曰胡充華在位十三年年十九孝文曾  
孫京兆王愉孫洮王寶暉子劉立爲幼帝在位六十  
日爲爾朱榮所害獻文孫彭城王勰第三子立是爲  
孝莊帝母曰李妃在位三年年二十四爲爾朱兆所  
害爾朱世隆立太武玄孫長平王曄在位六十日廢之  
又立獻文之孫廣陵王羽之子是爲前廢帝母曰王  
氏在位一年年二十五爲高歡所害立章武王馳第  
三子是爲後廢帝母曰程氏在位二年年二十遜位



於孝文之孫廣平王懷第三子是為出帝母曰李氏  
 遷都長安為宇文泰所醜在位五年年二十五泰立  
 孝文孫京兆王愉之子是為西魏文帝母曰楊氏在  
 位十七年年四十五長子立是為廢帝母曰乙弗后  
 在位三年弟立是為恭帝在位三年禪於後周  
 申歲道武建國至恭帝丙子歲凡  
 七代十八帝共一百六十一年

後周太祖文帝姓宇文氏代郡武川人也其先出自  
 炎帝神農氏為黃帝所滅子孫遁居朔野有葛烏菟  
 者雄武多算略鮮卑慕之奉以為主遂總十二部落  
 世為大人其後普迴因狩得玉璽三紐有文曰皇帝

璽普迴異之以為天授其俗謂天曰宇因號宇文國  
 并以為氏焉普迴子莫那自陰山南徙始居遼西是  
 曰獻侯為魏舅生之國九世至侯豆歸為慕容晃所  
 滅其子陵仕燕拜附馬都尉封玄菟公魏道武將攻  
 中山陵從慕容寶禦之寶敗率甲騎五百歸魏拜都  
 牧王賜爵安定侯天興初徙豪傑於大都陵隨例遷  
 武川焉陵生系系生韜竝以武畧稱韜生肱任俠有  
 氣幹正光末沃野鎮人破六汗披陵作亂遠近多應  
 之其偽署王衛可孤徒黨最盛肱乃糾合鄉里斬可  
 孤其眾乃散後避地中山遂陷於鮮于脩禮脩禮令

肱還統其部衆後爲定州軍所破沒於陣武成初追尊曰德皇帝太祖德皇帝之子仕西魏爲太師大冢宰大將軍封安定公恭帝三年薨世子嗣大將軍位其年受魏禪卽天王位是爲孝閔帝追尊太祖爲文王武成初追尊文皇帝孝閔母曰文皇后在位二百七十日爲宇文護所廢太祖長子大將軍寧都郡公立是爲明帝母曰姚夫人卽天王位四年年二十七太祖第四子大將軍魯國公立是爲武帝母曰叱奴太后卽皇帝位十八年年三十六太子立是爲宣帝母曰李太后在十二年傳位于太子是爲靜帝宣帝自

稱太上皇帝年二十二靜帝母曰朱皇后在位二年禪

于隋

後周自閔帝丁丑歲建國至靜帝辛丑凡三代五帝二十五年

隋高祖文帝姓楊氏弘農華陰人漢太尉震八代孫

鉉仕燕爲北平太守鉉生元壽後魏代爲武川鎮司

馬子孫因家焉元壽生太原太守惠嘏惠嘏生平原

太守烈烈生寧遠將軍禎禎生大司空隋國公忠從

周太祖起義關西賜姓普六茹氏開皇初追謚武元

皇帝忠生高祖受周禪卽皇帝位復姓楊氏母曰呂

皇后在位二十四年年六十四太子立是爲煬帝母

曰獨孤皇后在位十四年唐高祖立帝之孫元德太

子昭之子是為恭帝母曰韋妃在位二年禪于唐封  
 為鄆國公明年薨年十五隋自高帝巳酉建國至恭  
 帝戊寅凡三代三帝三十  
 年八

唐高祖神堯帝姓李氏隴西狄道人其先出自顓頊  
 顓頊生大業大業生女華女華生咎繇其子孫綿歷  
 虞夏代為理官遂為理氏殷末有理徵者直道不容  
 獲罪於紂子利貞逃難於伊侯之墟食李實得全又  
 改理為李氏周時在李氏虔者生子曰重耳字伯陽  
 周柱下史道家稱老君秦將李信即其後也信曾孫  
 廣為漢將前軍自此後代為牧守廣十六葉孫李暠

是為涼武昭王薨子歆嗣位為涪渠蒙遜所滅歆子  
 重耳奔於江南仕宋為汝南郡守復歸於魏拜弘農  
 太守贈豫州刺史生熙起家金門鎮將後以良家子  
 鎮於武川都督軍戎百姓之務終於位因遂家焉生  
 天錫仕魏為幢主大統時追贈司空公生太祖景皇  
 帝虎少倜儻有大志好讀書而不存章句尤善射輕  
 財重義雅尚名節深為太保賀拔岳所重元顥之入  
 雒也從岳擊平之以功封晉壽縣開國子食邑三百  
 戶拜寧朔將軍屯騎較尉復與岳破万俟醜奴留鎮  
 隴西累遷東雍州刺史尋轉衛將軍賀拔岳既鎮隴

右以太祖爲左相大都督委以內外軍事岳尋爲侯  
莫陳悅所害太祖哭之甚慟陰懷復讐之志時岳兄  
勝在荊州太祖星夜赴告勸勝入關收岳之衆勝不  
能從俄而周文帝起兵圖悅太祖聞之自荊州還至  
閩鄉爲高歡將所獲送詣雒陽魏武帝將收關右見  
太祖甚喜拜爲衛將軍賜以金帛鎮關中同與周文  
帝平侯莫陳悅遇高歡入雒太祖帥師迎魏武帝於  
潼關以功拜驍騎將軍加儀同三司遇靈州刺史曹  
泥擁兵作亂太祖率兵擊之時有破野頭賊屯聚塞  
下太祖遣使諭之皆來降服遂徵其衆并力攻泥四

旬而尅靈州平會阿至羅部落別道斷其歸路太祖  
親率驍銳擊大破之悉虜其衆進封長安縣侯食  
邑五百戶太祖不受讓於兄子康生周文帝許之後  
從文帝破高歡於沙苑斬級居多有賊帥梁企定據  
河州作亂太祖以本官兼尚書左僕射爲隴右行臺  
總兵以擊之部將烏軍長命潛與企定相連陰圖不  
軌太祖斬之以令三軍賊聞而大懼不敢戰遁走河  
北太祖將濟師於河企定率衆降獲男女數萬口以  
實三輔進位開府儀同三司餘如故南岐州兵楊益  
生馬僧等聚衆反與梁漢中相影響太祖以還師便

道擊之軍大散遣人諭以禍福益生遣使偽降太祖  
察知其懷詐因令軍曰賊旣降可休士放馬以俟還  
期遣其使反益生大喜遂不爲備放兵於外營求糧  
食太祖因而趨之天將曉圍城已合外兵不得還城  
中大擾因令壯士排闥而入無敢動者軍令嚴肅秋  
毫不犯於是安輯其衆留別人鎮守俘益生以歸周  
文帝嘉歎之遣使勞問尋授岐州刺史遇莫折後熾  
寇秦州太祖又討之軍臨賊境後熾懼而降歸收其  
精卒數千人會丁母憂哀毀過禮及葬特給輜輶車  
太祖因廬於墓側負土成墳優詔起令視事嘗與周  
文帝閱武於北山下時有人爲豹所噬無敢救者太  
祖不暇持杖趨往捉豹殺之周文帝大悅曰公之名  
虎信不虛也後徙封趙郡公歷渭秦二州刺史復擊  
叛胡平之徙封隴西公進拜太尉遷右軍大都督柱  
國大將軍少師周受魏禪錄佐命功居第一追封唐  
國公生世祖元皇帝昞世祖性至孝沉深有識量少  
爲周文帝所禮在位十七年封汝陽縣伯食邑五百  
戶尋拜撫軍大將軍大都督通直散騎嘗侍俄轉車  
騎大將軍襲封隴西公遷驃騎大將軍開府儀同三  
司侍中周受禪襲封唐國公拜御中正大夫歷鄜州

刺史安州總管為政簡靜甚獲當時之譽尋遷柱國  
 大將軍贈少保同華等八州刺史高祖即元皇帝之  
 世子母曰元貞皇后七歲襲封唐國公義寧二年受  
 隋禪即皇帝位在位九年傳位於皇太子是為太宗  
 年七十太宗母曰竇皇后在位二十三年年五十七  
 太子立是為高宗母曰文德長孫皇后在位三十四  
 年年五十六太子立三十六日母武太后廢為廬陵  
 王立次子相王六年又降為皇嗣賜姓武氏太后遂  
 革命稱周凡十五年復以廬陵王為太子尋即皇帝  
 位是為中宗在位六年年五十五太子立是為少帝

母韋庶人臨朝凡十七日相王第三子臨淄王隆基

平韋氏亂奉相王即皇帝位是為睿宗在位三年年五

十九太子立是為玄宗母曰昭成竇皇后在位四十

四年傳位於太子是為肅宗玄宗稱太上皇年七十

八肅宗母曰元獻楊皇后在位七年年五十二太子

立是為代宗母曰章敬吳皇后在位十七年年五十

四太子立是為德宗母曰睿貞沈太后在位二十六

年年六十四太子立是為順宗母曰昭德王皇后在

位百八十日傳位於太子是為憲宗順宗稱太上皇  
 年四十六憲宗母曰莊憲王太后在位十五年年四

十三太子立是為穆宗母曰懿安郭太皇后在位四  
年年三十太子立是為敬宗母曰恭僖王太皇在位  
二年年十八弟穆宗第二子江王立是為文宗母曰  
貞獻蕭皇后在位十四年年三十二弟穆宗第五子  
頴王立是為武宗母曰宣懿韋皇后在位四年年年三  
十二憲宗第十三子皇太叔立是為宣宗母曰孝明  
鄭皇后在位十三年年五十太子立是為懿宗母曰  
元昭晁太后在位十四年年四十一太子立是為僖  
宗母曰惠安王皇后在位十五年年二十七母弟立  
是為昭宗在位十六年年三十八第九子輝王立是

為哀帝母曰積善何太后在位四年禪于梁梁封為

濟陰王明年薨年十七 唐自高祖戊寅歲建國至哀

后革命共二百九十年 帝丁卯凡五代二十帝通武

後唐太祖武帝本姓朱耶氏其先隴右金城人也始

祖拔野唐貞觀中為墨離軍使從太宗討高麗薛延

陀有功為金方道副都護因家於瓜州太宗平薛延

陀諸部於安西北庭置都護以屬之分同羅僕骨之

人置沙陁都督府蓋北庭有磧曰沙陁故因以為名

焉承徽中以拔野為都督其後子孫五世相承曾祖

蓋忠貞元中繼為沙陁府都督既而為吐蕃所陷乃

舉其族七千帳徙於甘州盡忠等率部衆三萬東奔俄而吐蕃追兵大至盡忠戰沒祖執宜卽盡忠之長子也收合餘衆至於靈州德宗命爲陰山府都督元和初入爲金吾將軍遷蔚州刺史代北行營招撫使莊宗卽位追謚爲昭烈皇帝廟號懿祖烈考國昌本名赤心仕唐朔州刺史咸通中討龐勛有功入爲金吾上將軍賜姓李氏名國昌仍係鄭王一房出爲帳武節度使尋爲吐蕃所襲退保於神武川及武皇鎮太原表爲代北軍節度使中和三年薨莊宗卽位追謚爲文皇帝廟號獻祖太祖卽獻祖之第三子也母曰秦氏仕唐爲河東節度使累封晉王天祐四年唐哀帝已禪于梁改元開平而太祖猶稱天祐至五年薨年五十三長子嗣晉王位是爲莊宗同光初追謚爲武皇帝廟號太祖莊宗母曰貞簡曹皇后天祐二十年卽皇帝位於鄴都其年平梁在位四年年四十三蕃漢馬步總管李嗣源爲三軍所立百寮勸進是爲明宗明宗北代人生於應州之金城縣世事太祖及其賜姓也遂編入屬籍四代祖聿贈麟州刺史天成初追尊爲孝恭皇帝廟號惠祖曾祖敖贈朔州刺史追尊爲孝質皇帝廟號毅祖祖琰贈蔚州刺史追



尊為孝靖皇帝廟號烈祖考寬贈汾州刺史追尊為  
 孝成皇帝初孝成事獻祖為愛將獻祖之失振武為  
 吐渾所攻部下離散孝成獨奮忠義解蔚州之圍明  
 宗即孝成之元子母曰劉氏追尊孝成懿皇后在位  
 八年年六十七第三子宋王立是為愍帝母曰昭懿  
 皇后在位百五日出奔於衛州太后令降為鄂王  
 薨年二十一明宗養子潞王立是為末帝姓王氏鎮  
 州人母曰宣憲魏皇后在位三年年五十三晉高祖  
 入雒自焚

後唐自莊宗癸未歲建國至末  
 帝丙申凡三代四主十四年

晉高祖姓石氏北京晉陽人也本衛大夫碯之後至  
 漢奮自河內徙家長安與子慶等德位俱盛時號萬  
 石君漢衰關輔亂子孫流徙西裔有居甘州者四代  
 祖璟以唐元和中與沙陀軍都督朱耶氏靈武入附  
 憲宗嘉之諫為河東陰山府較以邊功累官至朔州  
 刺史天福二年追尊孝安皇帝廟號靖祖三代祖柳  
 早薨贈右散騎嘗侍追尊孝簡皇帝廟號肅祖祖昱  
 任振武防禦使贈尚書右僕射追尊孝平皇帝廟號  
 睿祖考紹雍蕃字曰臬捩鷄善騎射有經遠大略始  
 從後唐太祖平定巢賊及事莊宗拒梁人戰上黨栢  
 仁討薊門劉守光有功功與周德威相亞德威鎮薊

莊宗承制授平州刺史行事多抗於德威德威憚其名嘗以禮下之俄改洛州刺史薨於任贈太傅追尊孝元皇帝廟號憲祖高祖卽憲祖第二子也母曰何氏追謚孝元懿皇后高祖事後唐尚明宗女永寧公主爲河東節度使兼中書令封趙國公清泰三年契丹酋長耶律氏至太原册立爲大晉皇帝是年入雒在位七年年五十一從子齊王立是爲少帝父曰敬儒爲莊宗騎將早薨母曰安太妃在位五年爲耶律氏所陷晉自唐祖丙申歲建國至少帝丙午凡二代二主十一年

漢高祖姓劉氏其先本沙陁部人也四代祖湍追尊

爲明元皇帝廟號文祖曾祖昂贈太保追尊爲恭僖皇帝廟號德祖祖俱贈太傅追尊爲昭獻皇帝廟號翼祖考瑛事後唐武皇爲列較贈太師追尊爲章聖皇帝廟號顯祖高祖卽顯祖之子母曰安氏追謚章懿皇后高祖仕晉爲河東節度使太尉兼中書令封北平王開運四年正月晉少主爲耶律氏所陷二月高祖卽皇帝位于太原稱天福十二年五月至東京在位二年年五十四第二子周王立是爲隱帝母曰

李太后在位三年禪於周漢自高祖丁未歲建國至唐成凡二代二主共四年

周太祖姓郭氏邢州堯山人或云本嘗氏子幼隨母

適郭氏故冒其姓高祖璟廣順初追尊爲睿和皇帝  
廟號信祖魯祖諶贈太保追尊爲明憲皇帝廟號僖  
祖祖蘊贈太傅追尊爲翼順皇帝廟號義祖考簡贈  
太師追尊爲章肅皇帝廟號慶祖初唐咸通中代北  
徐方用兵伐叛信祖僖祖從戎師接戰以勇敢知名  
義祖事後唐武皇爲帳中親信乾寧中從征澤潞邢  
雒累授河內馬步軍都虞候武皇平安敬思再定邢  
雒移授邢之軍職因卜居堯山縣武皇經啓霸圖觀  
兵大鹵劉仁恭陸梁燕薊窺何中原梁氏蠶食兩河  
干戈不息慶祖爲武皇內牙愛將專掌親軍指麾所  
行無不景從攻城野戰勇爵崇高天復中武皇兵出  
居庸山北尅捷以慶祖爲順州刺史太祖卽慶祖之  
子母曰王氏追謚章德皇后太祖仕漢爲樞密使兼  
侍中乾祐四年受漢禪在位四年年五十一養子開  
封尹晉王立是爲世宗本姓柴氏蓋太祖聖穆皇后  
之姪在位六年年三十九子梁王立是爲恭帝在位  
一年禪於大宋

周自太祖辛亥歲建國至恭  
帝庚申凡三代三主共十年

册府元龜

淮南李嗣京參閱

西極文翔鳳訂正

豫章黃國琦較釋

帝王部

二

誕聖

夫帝王之生必有休應豈非天命所屬歷數斯在警  
生靈之耳目爲天飛之兆朕者乎故神祇幽贊靈物  
保護冥符夢感昭啓聖跡紛綸雜沓觸類而長諒不  
可談悉矣歷代而下質文斯變緣情之禮隨時而作

亦以極臣子之誠顯邦家之慶紀乃誕日崇乎美名  
錄是陳宴享之禮洽魚藻之歡設桑門之饌脩福田  
之事公卿士庶為節物以相遺詣侯牧守奉貢珍而  
來觀斯亦一時之盛觀百王之所不易者矣

伏羲氏母曰華胥燧人之世有大人之迹出雷澤華  
胥履之生帝於成紀

神農氏母曰女登為少典妃遊華陽有神人身龍首  
感女登於嘗陽而生帝

黃帝母曰附寶見大電光繞北斗樞星炤郊野感附  
寶而孕二十月而生帝於壽丘

少昊母曰女節黃帝時有大星如虹下流華涖女節  
夢接感而生帝

顓頊母曰女樞少昊之末瑤光之星貫月如虹感女  
樞於幽房之宮生帝於若水

高辛不見其母生而神靈自言其名曰契  
堯母曰慶都觀于三河嘗有龍隨之旣而陰風四合

赤龍感之孕十四月而生帝於丹陵  
舜母曰握登見大虹意感而生帝於姚墟

夏禹母曰脩巳山行見流星貫昴夢接意感又吞神  
珠背剖而生禹於石

一云質折而生

啓母曰塗山氏初禹治洪水通輶轅山化爲熊謂塗山氏曰欲餉聞鼓聲乃來禹跳石誤中鼓塗山氏往見禹方作熊而去至嵩高山山下化爲石方生啓禹曰歸我子石破北方而啓生

湯母曰扶都見白氣貫月意感以乙日生湯故號天

乙

周文王母曰太任夢長人感已溲于豕牢而生文王

漢高祖以秦昭王五十一年生於豐臣欽者等曰自

月及無年初母媼嘗息大澤之陂夢與神遇時雷電

晦冥父太公往視則見交龍於上已而有娠遂產高

祖一云母名含始遊于維池有玉雞銜赤珠刻曰王英吞此者王含始取而吞之

惠帝以秦始皇三十七年生於豐

文帝以漢王四年生初帝母薄姬高祖召欲幸之對

曰昨暮夢龍據妾胸高祖曰是實貴徵也吾爲汝成

之遂幸有身歲中生帝於河南

景帝以孝惠七年生於代宮

武帝以孝景前元年生於長安初帝母王夫人內大

子宮臣欽若等曰太子幸愛之生三女一男男方

娠夢日入其懷以告太子太子曰是貴徵也遂生武

帝

昭帝以太始三年生於鉤弋宮母曰趙婕妤

二字或從女

本以有奇異幸

謂望氣者言有奇女天子氣

生帝亦奇異

十四月乃生

宣帝以征和二年生於太子宮

元帝以元平元年生於長安尚冠里

成帝以甘露三年生於甲觀畫堂

甲觀甲乙丙之次也畫堂畫以為飾

哀帝以河平四年生於定陶

平帝以元延四年生於中山

孺子以元始四年生於廣戚

後漢光武以建平元年十二月甲子夜生於濟陽縣

含有赤光炤室中

明帝以建武四年五月甲申生於嘗山元氏

章帝以中元二年生於雒陽

和帝以建初四年生於雒陽

殤帝以元興元年秋生於雒陽

安帝以永元六年生於清河邸

順帝以元初元年生於雒陽

冲帝以漢安二年生於雒陽

質帝以永和三年生於渤海

桓帝以陽嘉元年生於蠡吾

靈帝以永壽三年生於河間饒陽解瀆亭

弘農王以熹平二年八月丙寅生於雒陽宮

獻帝以光和四年三月癸巳生於雒陽宮帝母王美人初妊娠畏何后服藥欲除之而胎安不動數夢負日而行

魏文帝以後漢中平四年冬生於譙時有雲氣青色而圓如車蓋當其上終日望氣者以爲至貴之證非人臣之氣

高貴鄉公以正始三年九月二十五日生其日天氣晴朗堂上黃雲炤耀久之乃散

晉元帝以咸寧二年生雒陽有神光之異一室盡明所藉藁如始刈

後魏道武母賀氏因遷徙遊於雲澤寢夢日出室內寤而見光自牖屬天欬然有感以建國三十四年七月七日生帝於叅合陂北其夜復有光明

明元以登國七年生於雲中宮  
太武以天賜五年生於東宮

文成以太平真君元年六月生於東宮  
獻文以興光元年七月生於陰山之北

孝文以皇興元年八月戊申生於平城宮神光炤室天地氤氳和氣充塞



宣武母高夫人初夢爲日所逐避於牀下日化爲龍繞已數匝寤而驚遂有娠以太和七年閏四月生帝於平城宮

孝明以永平三年三月丙戌生於宣化殿之東北有光炤於庭中

後周太祖母王氏初孕五月夢抱子昇天不至而止

寤以告德皇帝

太祖父也

帝喜曰雖不至天貴亦極矣及

太祖生有黑氣如蒼下覆其身

孝閔帝以西魏大統八年生於同州

明帝以永熙三年生於統萬城

武帝以大統九年生於同州有神光炤室

宣帝以武成元年生於同州

靜帝以建德二年六月生於東宮

隋高祖以西魏大統七年六月癸丑夜生於馮翊般若寺紫氣充庭

唐高祖以後周天和元年十一月丁酉生於長安是日紫氣充庭神光炤室

太宗以隋開皇十八年十二月戊午生於武功之別館時有二龍戲於館門之外三日而去

高宗以貞觀二年六月生於東宮之麗正殿

中宗以顯慶元年十一月乙丑生於長安

睿宗以龍朔二年六月己未生於長安

玄宗以垂拱元年八月五日生於東都

開元十七年八月癸亥以降誕之日大置酒張樂宴百寮於花萼樓下終宴尚書左丞相源乾曜右丞相張說率文武百官等上表曰臣聞聖人出則日月記其初王澤溥則風俗傳其後故少昊著流虹之感商湯本玄鳥之命孟夏有佛生之供仲春修道祖之籙追始樂原其義一也伏惟開元神武皇帝陛下二氣合神九龍浴聖清明總於玉露爽朗冠於金天月

仲秋日在端午嘗星不覓之夜祥光炤室之期群臣

相賀曰誕聖之辰也焉可不以為嘉節乎比夫曲水

禊亭重陽射圃五日綵線七夕粉筵豈同年而語也

臣等不勝大願請以八月五日為千秋節臣欽若等曰誕聖節

名始於此著之甲令布於天下咸令宴樂休假三日群臣

以是日獻甘露醇酎上萬歲壽酒臣欽若等曰王公

戚里進金鏡綬帶士庶以絲結承露囊更相遺問村

社作壽酒宴樂名為賽白帝報田神上明玄天光啓

大聖下彰皇化垂裕無窮異域占風同見美俗帝手

詔報曰凡是節日或以天氣推移或因人事表記八

月五日當朕生辰感先聖之慶靈荷皇天之眷命卿等請爲令節上獻嘉名勝地良游清秋高興百穀方熟萬寶以成自我作古舉無越禮朝野同歡是爲美事依卿來請宣付所司

十八年六月禮部奏請千秋節休假三日及村閭社會並就千秋節先賽白帝報田祖然後坐飲從之

八月丁亥御花萼樓以千秋節百官獻賀賜四品已上金鏡珠囊繅綵賜五品以下束帛有差上賦八韻

詩又製秋景詩

臣欽若等曰自此已後或連年不書皆史氏闕文

二十三年八月五日千秋節御花萼樓宴群臣御製

千秋節詩序時小旱是日大雨百官等咸上表

二十四年八月五日千秋節帝御廣達樓宴群臣奏

九部樂內出舞人繩伎頒賜有差下制曰自古風俗

所傳歲時相樂亦合因事大小在人朕生於仲秋厥

日惟五遂爲嘉節感慶誠涉今屬時和氣清年穀漸

熟中外無事朝野又安不因此時何云燕喜卿等卽

空坐飲相與盡歡又召京兆父老等宴之宣勅曰今

茲節日穀稼有成頃年以來不及今歲百姓旣足朕

實多歡故於此時與父老同宴自朝及野福慶同之

並空坐食食訖樂飲兼賜少物宴訖領取

天寶七載七月文武百官刑部尚書兼京兆尹蕭昭等及宗子威上表請改千秋節爲天長節從之

肅宗以景雲二年九月三日乙亥生於東宮之別殿

祥光炤室至德元年七月卽位二年九月戊寅以降

誕日王公已下咸有進獻帝以行在不受臣欽若等曰時安祿

山盜掠兩京故日行在

乾元元年八月甲辰上皇降誕日於金明樓宴百官

賜綵五百疋二年九月丙寅帝降誕日宴百官於宣

政殿前賜絹三千疋

上元二年九月天成地平節臣欽若等曰史於三殿不書置節年月

### 置道場

代宗以開元十四年十月十三日生於東都上陽宮

之別殿時玄宗幸汝州之溫陽有望氣者云宮中有

天子氣玄宗卽日還宮是夜帝降誕寶應元年四月

卽位十月宰臣等上言今月十三日皇帝降誕日望

唯天長節休假三日帝以山陵未畢不許宰臣又上

言休假一日從之

永泰二年十月降誕日諸道節度使進獻珍玩衣服

名馬二十餘萬計以陳上壽自是歲以爲嘗

大曆二年十月降誕日宰臣及嘗參官率錢修齋度

僧尼道士凡數百人

三年十月降誕日諸道節度使上壽各獻衣服名馬及綾絹凡百餘萬

四年十月降誕日百僚於章敬寺修齋行香陳樂大會

六年十月降誕日脩眾僧齋于資聖寺百僚行香諸道使各獻方物上壽

八年十月降誕日於資聖寺修一千僧齋度僧尼二百餘人

九年十月降誕日百僚分寺觀行香頒賜茶藥

德宗以天寶元年四月癸巳生長安東宮別殿大曆十四年五月卽位貞元六年四月乙酉帝降誕日京師諸司百官多於佛寺齋會

十二年四月庚辰帝降誕之日近歲嘗以其日會沙門道士于麟德殿講論帝每謂三教度儒教所歸不殊但內外跡用有異爾是日兼召儒官給事中徐岱兵部郎中趙需禮部郎中許孟容四門博士韋渠牟與沙門談延道士萬參成等數十人迭昇講坐論三

教初如矛戟森然相向後類江河同歸於海帝大悅

頒賜有差

是歲昭義節度使王虞休上表曰臣聞於師夫君子爲能知樂是故審音以知聲審

樂以知政則治道備矣清明廣大終始周旋與天地  
 同其和與四時合其身豈止於鐘鼓管磬云乎哉伏  
 見開元天長節著于甲令每于是日海宇懽娛稱萬  
 壽之無疆樂一人之有慶故追堯接舜邁禹踰湯自  
 周已後不能議矣今陛下降誕之辰未有惟新之典  
 無乃臣子之分或有所闕愚臣不揆頑昧敢思祖述  
 之私歌竊忤忘寢與食久矣適遇有知音者與臣論  
 其章樂探微致與窮理盡情臣乃追造繼天誕聖樂  
 一曲大抵八宮為調表五音之奉君也以土為德知  
 五運之居中也凡二十五篇法二十四氣而足成一  
 歲也每篇一十六拍象八元八愷登庸於朝也冀與  
 雲門咸池永傳於律呂空桑絲竹合薦於宮縣不聞  
 愆滯之聲長作中和之樂可使九方之人頓忘於肉  
 味四夷之俗皆審於薰風與唐惟休終古盡善臣不  
 勝懇款屏營之至謹昧死陳獻以聞其所造曲譜謹  
 同封進先時有太嘗樂人劉玠流落至潞州虞休因  
 令造誕聖樂  
 起於此也

順宗以上元二年正月十二日生

憲宗以大曆十三年二月十四日生永貞元年八月

即位十二月太嘗奏太上皇正月十二日降誕皇帝

二月十四日降誕竝請休假一日詔可

元和七年二月降誕日宰臣舉舊制例進衣一副李

吉甫獨進馬二匹賜通天犀帶一條金石凌一合

九年二月降誕日御麟德殿垂簾命沙門道士三百

五十人齋會于殿內食畢較論于高座晡而罷頒賜

有差

穆宗以貞元十一年七月六日生於大明宮之別殿

元和十五年正月即位閏正月辛亥太嘗禮院奏准

玄宗降誕爲千秋節

肅宗降誕爲天成地平節竝假一日自後累聖降誕雖不別置語名其休假獻餽如舊今皇帝七月六日降誕准故事合休假上禮從之

七月乙巳詔曰昔者聖王之法以孝理天下也廣愛敬之心推于四海盡奉養之志示于兆人然後自誠之化有情思感朕以眇身祇荷鴻業皇太后就安長樂朝夕承顏慈訓所加慶感兼極伏以今日六月是載誕之辰奉迎皇太后宮中上壽朕旣獲申歡慰亦欲公卿大夫同之立以今日六月平明於光順門集

百寮及外命婦進名賀皇太后朕御光順門內殿與百寮相見永爲嘗式又詔御麟德殿觀僧道講論頒賜有差先是尚書左丞韋綬以東朝舊恩多所陳奏請降誕日詔百官詣光順門先賀皇太后然後上皇帝壽書之史冊光示萬古帝忻然納焉其後竟以降誕受賀禮無所據罷之

長慶元年七月庚子降誕日百僚於紫宸殿稱賀畢詣昭德門外命婦詣光順門竝進門奉賀皇太后去年降誕稱賀百寮與命婦竝集於光順門群情以爲非便名改其儀

二年七月甲午降誕日宰臣率百寮入閣奉賀訖又詣光順門進名賀皇太后

徽宗以元和四年六月九日生長慶四年正月卽位四月庚辰朔中書門下奏皇帝六月九日降誕伏准故事休假一日從之其日帝御三殿命浮圖道士講論內官及翰林學士諸軍士駙馬皆從旣罷賞賜有差

寶曆元年六月勅降誕日文武百寮於紫宸殿稱賀及詣光順門奉賀皇太后自今已後宜停國朝本無降誕日賀儀蓋長慶初尚書左丞韋綬率情上疏行此禮至是方罷

二年六月降誕日御三殿命兵部侍郎丁公著太常少卿陸亘前隨州刺史李繁與浮圖道士講論內官翰林學士及諸軍使公主駙馬皆從旣罷賞賜有差文宗以元和四年十月十日生太和元年十月降誕日召祕書監白居易等與僧惟應道士趙常盈於麟德殿講論賜錦綵有差

二年十月壬戌以降誕日召吏部侍郎楊嗣復吏部郎中崔戎等赴麟德殿講論賜錦綵銀器有差四年十月辛亥降誕日命道士僭徒講論于麟德殿



是月鹽鐵使王涯進降誕綾羅錦綵等共一萬四千八百匹銀器一百事判度支王起進綾絹夾纈雜綵等共一萬四千三百匹御衣一副鏡一面諸方鎮稱是

五年十月甲戌降誕日命沙門道士講論于麟德殿七年八月中書門下奏臣聞帝王有必著之符神靈無虛應之兆所以電繞樞極氣感虹流玄鳥祚商赤光啓漢考驗今古章焯圖書伏惟皇帝陛下馭三統之元膺千年之運當誕聖之日爲河清之祥玄律應期乾宮以之定位開冬戒節水德表其靈長道若合符事光載籍臣等伏見前史稱漢宣之德則曰修武帝故事竝以漢之隆平莫如武帝後之爲理無及孝宣舉此二主以爲極盛今陛下功濟天下道覆寰中威統百靈宰御群品脩祖宗之德莫如貞觀開元且太宗幸慶善之宮卽降誕之所賦詩賜宴播爲樂章玄宗降聖之辰爲千秋之節王公上壽士庶交歡流于管絃書之甲令此時張說宋璟歷恨獻章二臣之心必無違禮國史所載昭然可徵近者廣集緇黃多爲法會誠有資於景福且未叶於舊儀夫四時成歲百穀成實必在首冬用成神化今臣等不勝大願請

以十月十日爲慶成節著在令式以示四方是日陛下於宮中奉迎太皇太后與昆弟諸王盛陳宴樂群臣詣延英門奉觴上千萬歲壽天下州府置宴一日積嘉祚於元命慶延洪於昌期上表中興之耿光次復開元之盛典臣等無任悽悽愾愾之至制曰省表具知朕以誕生之日延集緇黃式遵嘗儀用弘二教卿等啓心輔德叶志納忠稽貞觀開元之舊章述慶善千秋之令範爰崇誕日請號慶成顧予寡昧懼忝彝典今以同歡心於萬國申盛禮於兩宮深嘉誠勤是用依允十月甲午延英對宰臣因謂曰降誕設齋

起自近代朕緣相承已久未可便革雖置齋會唯對

源中等暫入殿

臣欽若等曰源中姓王爲翰林學士

至僧道講論時盡

不臨聽宰臣等奏曰伏以誕聖之辰普天同慶陛下只合侍皇太后與諸王盛陳宴樂以奉慈顏齋會誠資景福且非中國教化伏自開元十七年張說宋璟請以降誕爲千秋節事頗得宜今若修祖宗故事至是日奉迎兩宮太后歡宴實爲盛美帝深然之

八年九月勅慶成節宜令百寮詣延英上壽仍令太嘗寺具儀注聞奏仍准上巳重陽例於曲江錫宴九年十月慶成節詔宰臣及文武百官慶成節赴延

英殿庭奉觴稱賀禮畢錫宴於曲江亭

開成元年十月慶成節宴于延英殿太嘗進雲韶樂  
宰臣及翰林學士赴宴又錫百寮宴於曲江

二年九月詔曰慶成節朕之生辰天下賜宴庶同歡  
泰不欲屠宰用表好生非是信尚空門將希無妄之  
福恐中外臣庶不諭朕懷廣置齋筵大集僧衆非獨  
凋耗物力兼恐致惑生靈自今宴會蔬食任陳脯醢  
永爲嘗例咸使聞知又詔慶成節宜令京兆府准上  
巳重陽於曲江宴會文武百寮奉觴宜權停又詔慶  
成節假宜依上元日休假三日十月降誕日帝幸十

六宅與諸王宴樂是日賜宴百寮于曲江

三年十月慶成節命中人以酒脯并仙韶樂錫中書  
門下及文武百寮宴於曲江亭

四年十月慶成節宴中書門下及文武百寮於曲江  
亭命中人以酒脯及仙韶樂宣錫之

武宗以元和九年六月十一日生開成五年正月卽  
位五月中書奏請以六月十一日帝載誕日爲慶陽  
節從之

會昌元年五月辛未勅慶陽節百官率醜外別賜錢  
三百貫文以素食合宴仍委京兆府量事陳設不用

追集坊市歌舞

宣宗以元和五年六月二十二日生會昌六年三月  
卽位號壽昌節

懿宗以太和七年十一月十四日生大中十三年八  
月卽位號延慶節

僖宗以咸通三年五月八日生於東內十四年七月  
卽位號應天節

昭宗以咸通八年三月二十二日生於長安東內文  
德元年三月卽位龍紀元年三月帝載誕之日宰臣  
等表爲嘉會節從之群臣上表賀曰臣聞聖人受命

天必降其殊靈王者應生國必蒙其介祉故華渚有  
流虹之異玄樞呈大電之祥而皆近感神明遠符乾  
象叶千年而啓運契六合以居尊伏惟皇帝陛下德  
邁方圖道融三五因社鳴而正位逢并聚以樂推膺  
彼昌期弘斯丕構今者發生司律曆數在躬值清明  
馭氣之時當仁壽悅隨之始固可年同鶴算歲比山  
呼永符垂拱之風長保後天之慶

哀帝以景福元年九月三日生天祐元年八月卽位  
其是月中書門下奏皇帝九月三日降誕伏以電曜  
繞樞軒頊乃降天之日光輝炤室明元實命代之辰

爰自我朝乃崇令節著爲故事抑播前文伏惟皇帝  
陛下九五飛龍四三應運國稱利見天表殊休當誕  
聖之時感真人以衛室居在籓之際實羽客以獻符  
是以克紹丕圖光膺寶祚敢循故典爰定美文臣等  
商量以降誕日爲乾和節易曰乾健也蓋乾以自強  
不息和則衆彙皆同遠徵易文實諧聖德請依令式  
休假獻賀從之詔文武百寮諸軍諸使諸道進奉官  
准故事於寺觀設齋不得宰殺只許酒果脯醢

後唐莊宗以光啓元年十月癸亥生於晉陽宮在妊  
時太后嘗夢神人黑衣擁扇夾侍左右載誕之辰紫  
氣出於牕戶同光元年十月壬辰萬壽節百官齋會  
於開封府

二年十月丁亥萬壽節宴群臣於長春殿

三年十月辛巳萬壽節宴長春殿賜百官分物

明宗以咸通八年九月生於代北之金鳳城

天成元年六月中書奏九月九日皇帝降誕之辰舊  
例特置節名以其日爲應聖節休假三日仍令京都  
天下設樂以申祝壽從之

九月九日應聖節百寮於敬愛寺設僧齋召緇黃衆  
於中興殿論難經義

二年九月九日應聖節四方諸侯竝有進獻丁巳百官奉爲應聖節於敬愛寺行香設齋宣教坊伎宴樂之宰臣樞密使以下咸進壽酒各賜錦衣召兩街僧道於中興殿講論

三年九月九日應聖節召兩街僧道談經於崇元殿宰相進壽酒百官行香修齋於相國寺宣教坊樂及左右廂百戲以宴樂之又僧道虛受等賜紫衣師號共六十人

四年九月九日應聖節百官於敬愛寺齋設賜宰臣錦袍香囊手帕酒樂帝御廣壽殿近臣獻壽各頒錦袍復御中興殿聽僧道講論

長興元年九月九日應聖節百官於敬愛寺齋設帝御廣壽殿聽僧道講論

二年九月九日應聖節帝御中興殿觀僧道講論賜物有差

閔帝以天祐十一年十一月二十八日庚申生於晉陽舊第

末帝以光啓元年正月二十三日己卯生於平山

清泰元年九月壬申宰臣李愚等奏臣覽國史開元

十七年宰臣張說源乾曜奏改朔體元固聖主之能

事良辰嘉會亦俗化之大端蓋周人有合宴之儀漢  
代有賜醕之律所以歌詠皇德啓迪人情至若泛菊  
高臺遂號重陽之節流杯曲水永爲上巳之游在昔  
偶行於今不改豈足比君臨四海運應千年畫璿圖  
而敬授民時秉玉燭而節宣和氣身爲律度德合乾  
坤仰惟樞電之祥最是寰區之樂願從人欲特創節  
名封函尋示於允俞自此永編於令式舊章斯在列  
聖嘗行將有擬倫預慙膚淺伏惟皇帝陛下動遵典  
法克叶祖宗方今玉鏡高懸璿樞廣運告成功於朝  
社正大禮於宮闈是以舞干率服於三苗班瑞雍熙  
於萬國臣等以獻歲元正之月是倚蘭降聖之辰梅  
花映雪於上林椒酒迎春於祕殿江邊野老願鑿輅  
之時巡陌上遊童醉堯樽而獻祝謂於是月特舉節  
名副與人共樂之言致率土交歡之義臣等謹案玄  
宗皇帝以八月五日載誕張說等請以其日爲千秋  
節臣等不揆庸暗輒體憲章請以來年正月降聖日  
爲千春節從之

二年正月乙巳中書門下奏遇千春節凡刑獄公事  
奏覆候次月施行今後請重繫者卽俟次月輕繫者  
卽誕聖節前奏覆決遣從之戊戌於佛寺供僧張樂

甲子宴群臣於長春殿

晉高祖以唐景福元年二月二十八日生於太原汾陽里時有白氣充庭

天福元年十二月宰臣馮道等奏曰臣聞惟睿作聖千年乃契於貞期大德曰生萬國咸思於令節將詮懿號仰慶休辰傾心未出於嘗名近意有塵於嘉會伏惟皇帝陛下應天順人握圖御寓拯寰瀛於否極俾動植以泰來允符鳴社之祥方顯繞樞之瑞而况斗柄正卯律吹仲春當帝王出震之方是天地同和之月斯辰誕聖衆靈咸歸顧前代而罕同在舊章而

宜舉垂諸不朽簡編旣溢於徽猷必也正名稱謂須符於景貺伏願以來年二月二十八日爲天和節庶夫觴稱萬壽稍申將順之心節配四時永洽好生之德從之

二年二月辛亥天和節帝御長春殿召左右街僧錄威儀入內談經

十月兩浙錢元瓘進天和節大排方龍座金腰帶一御衣十二事

三年二月乙巳天和節岳牧玉帛皆至是日宴近臣於廣政殿召僧道講論各賜有差



四年二月庚子以天和節宴群臣於廣政殿賜物有

差臣欽若等曰五年事史臣不書

六年二月戊午天和節宴群臣於廣政殿賜道釋紫衣師號并寺額

十月福州進天和節銀一千兩

七年二月壬子天和節帝御武德殿宰臣率文武百官上壽如儀退就佛寺行香宴樂而罷其年詔天下郡縣不得以天和節禁屠宰輒滯刑獄

少帝以天祐十一年六月二十七日生於太原汾陽里天福七年六月卽位八年六月宰臣馮道以誕辰

率文武百官上表曰臣等聞大電繞樞哲后繼儀農

之運五星聚井真人啓文景之基昌圖允洽於千年

嘉號空光於載誕不有稱述曷顯休明伏惟皇帝陛

下土律調元金華啓旦上帝錫九齡之夢適人聞下

武之詩德協無爲民知有慶當大雨時行之日乃嘗

星不見之辰將歡寓縣之心竊效華封之祝臣等不

勝大願望以六月二十七日爲啓聖節著于甲令告

彼萬方使地角天涯望南山而祝壽九州四海仰北

極以傾心誠垂致主之功輒敢稱君之美從之

漢高祖以唐乾寧二年二月四日生於太原以晉開

運四年卽位於太原宮復稱天福十二年是年八月  
文武百寮上表請以二月四日降誕日爲聖壽節從  
之

隱帝以唐長興二年三月九日生於鄴都之舊第乾  
祐元年十二月辛卯百寮上表曰色變長瀾肇皇靈  
之寶構光流華渚開聖緒於瑤圖莫不慶洽同文光  
昭大象刻玉波泐於鳳紀鳴金颺振於洪猷所以  
氣凝空編爲令典神光燭夜允叶昌期皇帝陛下守  
位以仁繼明以德化敷有感慶洽無疆當九龍洽聖  
之辰是五緯聯光之夕凡蒙地載共祝天長皇帝三  
月九日誕聖請以其日爲嘉慶節休假三日群臣宴  
樂上壽從之

二年三月壬子嘉慶節群臣詣佛寺齋設祝壽

三年三月丙子嘉慶節御廣政殿文武百寮上壽酒  
初舉樂將相大臣獻金寶鞍馬爲壽禮畢群臣入相  
國寺齋設賜教坊樂

周太祖以唐天祐甲子歲七月二十八日庚寅之夕  
生於堯山之舊宅載誕之夕赤光照室初有聲如爐  
炭之裂星火四迸母王氏懼戒使者曰勿外言  
廣順元年六月甲午宰臣率百官上表曰恭以少昊

乘乾曳祥虹於華渚軒轅出震流瑞電於樞星所以  
玉牒表天地之禎金策纂皇王之異仰惟聖德允叶  
昌期伏惟聖帝陛下德輝三五道煥古今開階成周  
室之昌啓運得堯基之典豈可使方濁澄明之狀未  
顯洪名圖清燦爛之文不章懿號臣等傾誠紫禁都  
慶丹丘願隆百代之基奠正萬年之祚臣等請以七  
月二十八日皇帝降聖日爲永壽節群臣上壽內外  
宴樂從之

七月戊子永壽節帝御廣政殿百寮進酒上壽班退  
賜衣服分物有差群臣赴相國寺齋設

二年四月癸丑勅永壽節每年諸道節度防禦團練  
等使刺史奏薦僧尼道士紫衣師號等今後見任節  
度使帶使相僧尼道士紫衣師號可共奏三人見任  
節度使不帶使相共二人見任防禦團練刺史等祇  
奏一人在朝文武臣寮及前任官今後更不得奏薦  
七月丙辰勅内外文武臣寮遇永壽節辰皆於寺觀  
起置道場便爲齋供訪聞皆是率醮不唯牽費兼且  
勞煩念忠節以可嘉在誠抱而增愧所宜減損以便  
公私今後中書門下與文武百寮共設一齋樞密使  
與内諸司使副使等共設一齋侍衛親軍馬步都指

揮使已下共設一齋其餘前任官員及諸司職掌並不得更請開置道場及設齋

壬午永壽節群臣詣廣政殿上壽畢赴相國寺齋設宰臣學士內諸司使前任節度使防禦團練等士侍御諸軍都將刺史等賜衣各一襲

三年七月京城居民晁緒等言以永壽節各於門首齋燃燈三晝夜從之乙巳永壽節太祖御永福殿群臣上壽賜將相大臣禁軍大將等衣有差群臣赴僧寺齋會

世宗以唐天祐十八年九月二十四日丙午生於邢

臺之別墅

顯德元年七月壬辰文武百寮上表曰伏以壽丘降跡爰符出震之期里社應祥式契乘乾之運頃觀舊史抑有彝章幸當載誕之辰仰奉延洪之稱伏惟皇帝陛下道超九聖祚啓千齡紹文武之耿光比成康之迪哲白登天寶益顯聖功運龍韜而親御戎車仗金鉞而立平賊寇破幽并之妖孽救澤潞之生靈觀兵而直抵晉陽奮武而遠臨代北元兇假息雜虜摧鋒還京闕而契人心謁園陵而伸孝道飲至纔踰於旬日覃恩已被於八方四塞關山漸息煙塵之警萬

邦臣妾咸登仁壽之鄉今則候屬澄河時當降聖是  
甲觀懸弧之日乃銅律禦戶之時鰈水鷓林望堯雲  
而獻祝桓圭穀璧趨禹會以駿奔臣等叨遇休明俱  
塵祿位荷君父巍巍之德伸臣子悽悽之誠祇率典  
謨尊奉宸極臣等不勝大願謹以九月二十四日降  
誕日奉上節名爲天清節所奠金相玉振貞寶曆以  
彌新地久天長煥青編而不朽從之

九月乙未天清節帝御廣政殿宰臣率文武百寮上  
壽如儀頒賚有差

二年九月巳丑天清節帝御廣政殿文武百寮上壽  
三年九月癸丑天清節賜文武臣寮衣有差宰臣率  
百官詣廣政殿上壽如儀

四年九月丁未天清節百辟上壽如儀賜內外臣寮  
衣有差

五年九月壬子天清節賜文武臣寮衣有差既而詣  
廣德殿上壽江南進奉使商崇義代李景捧壽觴以  
獻既罷百官詣相國寺修齋

恭帝以廣順三年八月四日生於澶州之府第顯德  
六年卽位其年文武臣寮上表請以八月四日爲天  
清節從之

元龜 卷之二

册府元龜

淮南李嗣京參閱

西極文翔鳳訂正

豫章黃國琦較釋

帝王部

名諱

周官小史掌王之名諱名諱之起繇周道也上古帝王敦尚質樸名號雖建制度未備故堯舜則有放勛重華之名而禹湯又去唐虞之文從高陽之質以名為號先儒之說或以為名或以為字或以為謚而尚

册府元龜 帝王部 卷之三

書所紀即皆褒德之稱蓋傳述之異也自漢已來所  
記詳矣至若貴易諱而難知避五行之勝伏亦皆有  
旨焉

黃帝名曰軒轅蓋受國於有熊居軒轅之丘因以為  
名又以為號又云作軒冕之服故謂之軒轅

少昊名摯字青陽

顓頊高陽

帝嚳高辛

高陽高辛皆所興之地名顓頊與嚳皆以字為號上古質故也

帝摯

帝堯名放勳

帝舜名重華

夏禹名文命

帝啓

帝太康

帝仲康

帝相

帝少康

帝寧

一作杼

帝槐

帝芒

帝泄

帝不降

帝局

帝厘

帝孔甲

帝皐

帝發

帝履癸是為桀

殷湯名履字天乙

帝外丙

帝仲壬

帝太甲

帝沃丁

帝太康

帝小甲

帝雍巳

帝太戊

帝仲丁

帝外壬

帝河亶甲

帝王部

卷之三

帝王部

卷之三



帝祖乙

帝祖辛

帝沃甲

帝祖丁

帝南庚

帝陽甲

帝盤庚

帝小辛

帝小乙

帝武丁

帝祖庚

帝祖甲 一作帝甲

帝廩辛

帝康丁

帝武乙

帝太丁

帝乙

帝辛是為紂

周文王昌

武王發

成王誦

康王釗

昭王瑕

穆王滿

恭王瓘

一作伊扈

懿王囂

一作囂

孝王辟方

一单名方

夷王燹

厲王胡

宣王靜

幽王宮涅

平王宜臼

桓王林

莊王佗

釐王胡齊

惠王閔

襄王鄭

頃王壬臣

匡王班

定王瑜

簡王夷

靈王泄心

景王貴

悼王猛

敬王丐

元王仁

一日赤元王

定王介

一日且定王

哀王去病

忠王叔

考王嵬

威烈王午

安王驕

烈王喜

顯王扁

慎靚王定

赧王延

漢高祖皇帝諱邦字季邦之字曰國臣下所避以相代也

惠帝諱盈之字曰滿

文帝諱恒之字曰嘗

景帝諱啓之字曰開

武帝諱徹之字曰通

昌邑王諱賀

臣欽若等曰史氏不載其諱字

昭帝諱弗之字曰不帝初爲皇太子名弗陵後但名弗以二名難諱也

宣帝諱詢字次卿詢之字曰謀帝初各病已蓋以夙遭屯難而多病故名之欲其速差也元康二年詔曰聞古天子之名難知而易諱也今百姓多上書觸諱以犯罪者朕甚憐之其更諱詢諸觸諱在令前者赦之

元帝諱奭之字曰盛

成帝諱騫之字曰俊帝初生于太子宮爲世嫡皇孫

宣帝愛之字曰太孫

哀帝諱欣之字曰喜

平帝諱衎之字曰樂帝初名箕子元始二年詔曰皇

帝二名通於器物

箕用器也故云通于器物

今更名合於古制使

太師光奉太牢告祠高廟

後漢光武皇帝諱秀字文叔秀之字曰茂初光武生

濟陽縣舍是歲縣界有嘉禾生一莖九穗因名曰秀

明帝諱莊之字曰嚴

章帝諱炆

丁達切

之字曰著

和帝諱肇之字曰始

殤帝諱隆之字曰盛改河內隆慮為林慮

安帝諱佑之字曰福

順帝諱保之字曰守

冲帝諱炳之字曰明

質帝諱續之字曰繼

桓帝諱志之字曰意

靈帝諱宏之字曰大

獻帝諱協字伯和協之字曰合

靈帝以帝似已故名之

魏文帝諱丕字子桓

明帝諱獻字元仲

齊王諱芳字蘭卿

高貴鄉公諱髦字彥士

陳留王諱奐字景明初為嘗道鄉公名璜甘露五年

五月己丑高貴鄉公卒皇太后立之詔曰古者人君

之為名字難犯而易諱今嘗道鄉公諱字甚難避其

令朝臣博議改易列奏遂改之

晉武帝諱炎字安世

惠帝諱衷字正度

懷帝諱熾字豐美

愍帝諱鄴字彥旗建興元年卽位改建鄴爲建康改

鄴爲臨漳

元帝諱睿字景文

明帝諱紹字道畿

成帝諱衍字世根

康帝諱岳字世同

穆帝諱暕字彭子

哀帝諱丕字千齡

簡文帝諱昱字道萬

孝武帝諱曜字昌明

安帝諱德宗字德宗

恭帝諱德文字德文

後魏道武帝諱珪

明元帝諱嗣

太武帝諱燾

文成帝諱濬

獻文帝諱弘

孝文帝諱宏

宣武帝諱恪

孝明帝諱詡

孝莊帝諱子攸

前廢帝亦曰節閔諱恭字修業

後廢帝諱朗字仲哲

孝武帝亦曰出帝諱循字孝則

西魏文帝諱寶炬

廢帝諱欽

恭帝諱廓

後周愍帝諱覺字陀羅尼

隋文帝諱毓小名統萬突太祖長子太祖臨夏州生帝

統萬城因以名焉

武帝諱邕字禰羅突

宣帝諱贇

靜帝諱暉初名衍

隋高祖諱堅小名那邏延

煬帝諱廣一名英小字阿摩長壽元年立為皇太子

改廣川縣為長河縣

恭帝諱侑

唐高祖諱淵

太宗諱世民幼時有相者云未年二十當濟世安民

高祖以爲神陰採濟世安民之義遂以名焉武德九年立爲皇太子令曰依禮二名義不偏諱尼父達聖非無前指近代以來曲爲節制兩字兼避廢闕已多率意而行有違經誥今宜依據禮典務從簡約仰效先哲垂法將來其官號人名及公私文籍有世及民兩字不連讀者竝不須避至高宗卽位乃改民部爲戶部以避之

高宗諱治卽位初有司請改治書侍御史爲御史中丞諸州治中爲司馬治禮郎爲奉禮郎帝以貞觀時不廢先帝二字不許有司奏曰先帝二名禮不偏諱

上旣單名臣子不敢指斥從之

顯慶五年正月壬寅詔曰孔宣設教正名爲首戴聖貽範嫌名不諱比見鈔寫古典至於朕名或缺其點畫或隨便改換恐六籍雅言會意多爽九流通義指事全違誠非立書之本意自今以後繕寫舊典文字竝宜使成不須隨義改易

中宗諱顯儀鳳二年十月封英王改名哲聖曆元年册爲皇太子復名顯神龍元年正月卽位改顯政殿爲昭慶殿顯德殿爲章德殿顯聖侯廟爲昭聖侯廟睿宗諱旦初名旭輪總章二年封冀王單名輪永淳



三年始改名且

玄宗諱隆基先天二年正月詔改隆州為閬州自餘州縣等名有與皇帝名同者便令所司改定至寶曆元年正月太嘗寺禮院上言玄宗廟諱准故事祧遷後不當更諱制可之

肅宗諱亨初名嗣昇開元十五年改名浚二十三年改名璵二十八年改名紹有獻書者言宋太子名邵惡其聲類天寶三載又改名亨

代宗諱豫初名俶乾元元年十月立為皇太子因降誕日豫州奏百姓李氏有嘉禾生及是册禮肅宗詔

改名豫寶應元年即位改豫州為蔡州泗州宿豫縣

改為宿遷縣兗州方與縣改為魚臺縣洪州豫章縣

改為鍾陵縣豫寧縣改為武寧縣古州樂豫縣改為

樂山縣

德宗諱适大曆十四年即位改括州為處州括蒼縣為麗水縣

順宗諱誦憲宗元和二年八月刑部奏改律卷第八

為鬪競律

咸通十二年分司侍御史李谿進狀曰臣准西臺牒及金部稱奉六月二十七日勅

內園院郝景全事奏狀內訟字音與廟諱同奉勅罰臣一季俸者右臣官位至卑得蒙罰俸屈與不屈不合有以事至分明別關理體若便隱默恐負聖時願陛下寬其罪戾使得盡言臣前奏狀稱准勅因事告

事旁訟他人是咸通十一年十月十三日勅語臣狀中具有在勅字非臣自撰辭句臣謹按禮不諱嫌名又按職制律諸犯廟諱嫌名不坐注云謂若禹與雨疏云謂聲同而字異注疏重復至易分曉伏惟睿文英武明德至仁大聖廣孝皇帝陛下明過帝堯孝踰大舜豈自發制勅而不避諱哉故是審量禮律以為無妨耳即引陛下勅文而言不敢擅有移改不謂內園使有此論奏也臣之罰俸實為小屈然今者非敢訴此罰俸也實以從來制勅及百官表奏曾有避嫌名例而因臣致罰即舊章自此有援引勅格者亦須委曲迴避便成訛弊臣今已罰俸不合上聞臣聞趙充國為將不嫌伐一時專以為漢家後法魏徵為相不存形迹以致貞觀太平臣雖未及將相忝為陛下持憲之臣豈可以論俸為嫌而使國家勅命有誤也且順宗廟諱萬國儀刑誠不可同於小事願陛下留意察納別下明勅使自後章奏遵禮律處分則天下幸甚勅尋免所罰

憲宗諱純初名淳貞元二十一年冊為皇太子始更

之永貞元年即位改桂州純化縣為慕化縣蒙州純

義縣為正義縣又改淳州為睦州還淳縣為清溪縣

橫州淳風縣為從化縣淳于姓改為于以音與帝同

名故也古者不諱嫌名禹與兩丘與蒞臨文不諱文

王名昌武王名發周詩曰克昌厥後又曰一之日臧

發魯莊公名同春秋曰同盟于幽襄公名午書曰陳

侯午卒之類是也古今時變故廣避焉

穆宗諱同于真宗初名宥元和七年立為皇太子始更之

十五年即位改嘗岳為鎮岳嘗州為鎮州定州嘗陽

縣為曲陽縣嘗王房子孫為泚王房

冊封元龜 帝王部 卷之三 十四  
敬宗諱湛

文宗諱昂初名涵卽位更之

武宗諱炎初名灑會昌六年三月制曰王者炤臨萬  
寓名豈尚于難知敬順五行理宐避于勝伏徵諸前  
史義實炳然昔炎漢之興雒傍去水所都名號猶乃  
避之况我國家祚昌土德豈可以王氣勝于君名所  
以憲宗繼明之初貴以捨水必有冥數協于禎祥漢  
宣帝柔服北夷弘其祖業功德之盛侔於周宣御曆  
十年乃從美稱朕遠追大漢之事近稟聖祖之謀爰  
擇嘉名式遵令典庶承天意永保鴻休宐改名爲炎  
仍令所司擇日分命宰臣告天地宗廟其舊名中外  
奏章不得更有迴避告報遐邇咸遂聞知

宣宗諱忱初名怡卽位更之

懿宗諱漼初名溫大中十三年八月立爲皇太子始  
更之

僖宗諱儂初封晉王名儼咸通十四年七月立爲皇  
太子乃更之

昭宗諱敏初名傑龍紀元年十一月辛亥將有事於  
圓丘始更之

哀帝諱祝初封輝王名祚天祐元年八月立爲皇太

子監國乃更之卽位先是太嘗寺有止鼓兩字樂器  
上字犯御名中書門下奏臣等謹按故事漢室以北  
山改郡蓋爲文皇國朝以復姓稱子實緣憲祖或易  
建康之縣或更昭穆之音皆因踐祚之初合舉避行  
之典按爾雅釋樂篇鼓謂之止敵謂之篥今者陛下  
肇承丕祚始值遷都凡厥惟新式叶正始竊詳爾雅  
肇亦訓始臣等商量望改爲肇從之

後唐莊宗諱存勗

明宗諱亶初名嗣源天成元年六月勅曰古者酌禮  
以制名懼廢於物難犯而易避貴便於時况徵彼二

名擲有前例以太宗文皇帝自登寶位不改舊稱時  
卽臣有世南官有民部靡聞曲避止禁連呼朕猥以  
眇躬託于人上止遵聖範非敢自尊應文書內所有  
二字但不連稱不得迴避如是臣下之名不欲與君  
親同字者任自改更務從私便庶體朕懷

二年正月制曰王者祇敬宗祧統臨寰宇必順體元  
之典特新制義之文朕以眇躬獲承丕構襲三百年  
之休運繼二十聖之耿光馭朽納隍夕惕之心罔怠  
法天師古日躋之道惟勤今則載戢干戈混同書軌  
荷玄穹之睠佑契兆庶之樂推簡玉泥金非敢期於

薄德耕田鑿井誠有慕於前王將陳享謁之儀卽備  
郊丘之禮宜更稱謂永耀簡編今改爲亶凡在中外  
宐體朕懷宣記百寮稱賀兼差官告郊廟社稷

清泰二年

五月中書門下奏准天成元年正月十六日勅本朝  
列聖及四廟諱近日中外表疏偏旁文字皆闕點畫  
凡當出諱止避正呼儻迴避於偏旁則虧闕於文字  
宜從朴素庶便公私凡廟諱但迴避正文其偏旁文  
字不在減少點畫今定州節度使楊壇檀州金壇縣  
等名酌情制義竝請改之其表章文案偏旁字闕點  
畫凡臣寮名涉偏旁亦請改之詔曰偏旁文字音韻  
懸殊止避正呼不宐全改楊壇宜賜名光遠其餘依  
奏

愍帝諱從厚小字菩薩奴

末帝諱從珂清泰二年中書言御名上一字與諸王  
相連太宗玄宗故事人臣諸王合避相聯字單名從  
之

晉高祖諱敬塘少帝天福七年勅應殿名及州縣名  
職名等有與高祖諱犯者悉改之明堂爲宣德殿唐  
州爲沁州思唐州爲思化州密州附唐縣爲膠西縣  
蔚州興唐縣爲靈山縣博州堂邑爲河濱高唐爲濟  
城定州唐縣爲博陵莫州唐興爲宐州真定府行唐  
爲永昌堂陽爲蒲澤彭州唐化爲彭山蜀州唐興爲  
鄉城道州延唐爲延喜福州福唐爲南臺壽州盛唐  
爲來化鄂州唐年爲臨江杭州錢唐爲錢江唐山爲

橫山台州唐興爲台興隨州唐城爲漢東代州唐林  
爲廣武漢州金堂爲漢城合州石鏡爲仙覽復州竟  
陵爲景陵中書政事堂爲廳堂後官諸房頭爲錄事  
餘竝爲主事所有諸邑人姓名犯者竝改又改陝府  
甘棠驛爲通津驛

少帝諱重榮

漢高祖本名知遠卽位初前邠州節度使折從遠改  
名從阮

乾祐元年勅曰朕祇膺景命肇啓鴻圖適當建號之  
初宜舉正名之典夫名以制義義以出禮禮以體政  
政以養民載考格言抑有彝訓顧性寡昧敢忘率循  
但君父之名貴於易避臣子之敬難以斥尊苟觸類  
以妨言必迂文而害理况宗廟方建禋祀匪遙祝嘏  
將期於正辭稱謂所宜於稽古爰從改革庶叶典章  
凡百臣寮當體朕意今改名嵩故茲札示想宜知悉  
少帝諱承祐

周太祖諱威廣順元年正月卽位相州張彥成澶州  
李洪義侍衛步軍指揮使曹英前陳州刺史馬令琮  
慶州刺史郭彥欽皆以名下一字與御名同改爲成  
義英琮欽

二月涇州節度使史康懿言臣名下一字與御名同改之

三月詔鄧州軍額改為武勝軍靈武屬郡宜改為環州避御名也

八月環州刺史雷彥洪以名下一字與御名改之

十二月御史臺奏唐景雲三年改左右屯衛大將軍為威衛又唐高宗名治其時改治書御史為御史中丞諸州治中為司馬蓋臣子上書合避名也請諸衛中舊是屯衛者復舊名從之

世宗謹案

尾

冊府元龜

淮南李嗣京參閱

西極文翔鳳訂正

豫章黃國琦較釋

帝王部 四

運歷

昔鄭子述五代之官紀蓋有倫矣稽之於易本其世數乃知庖犧之王正得天統共工繼起位非其序少昊之衰九黎亂德顛頊始復建重黎之官以司天地其後三苗干紀二官咸廢堯命羲和以纂其業授時

冊府元龜 帝王部

卷之四

定歲衆功。治既而授舜曰天之曆數在爾躬舜亦以命禹三代之際牲服殊典漢紹周世議論累葉訖於中興始定厥制魏晉而下南北迭起而天祿永終實在中夏至或徵諸儒之說集盈庭之言敷引異轍訟襲相戾及上循五德終始之傳叶三統因革之義頒正朔立制度咸推歷而更王居正而惟敘者矣太昊帝宓犧氏繼天而王為百王先首德始於木故為太昊帝

炎帝神農氏繼庖犧氏以火承木故為炎帝

黃帝軒轅氏繼神農氏火生土故為土德

少昊氏黃帝之子青陽也是其子孫名摯立上生金

故為金德天下號曰金天氏

顓頊高陽氏繼少昊氏金生水故為水德天下號曰

高陽氏

帝嚳高辛氏青陽玄囂之孫也繼高陽氏水生木故

為木德

帝堯陶唐氏封於唐蓋高辛氏衰天下歸之木生火

故為火德

帝舜有虞氏堯禮以天下

禮曰禪讓字也

火生土故為土德

伯禹夏后氏虞舜嬪以天下土生金故為金德故夏





是罷之明年黃龍見成紀天水之縣也文帝召公孫臣拜

為博士與諸生申明土德草改歷服色事自漢興之

初庶事草創唯一叔孫生略定朝廷之儀若乃正朔

服色郊望之事數世猶未章焉至於孝文始以夏郊

而張蒼據水德公孫臣賈誼更以為土德卒不能明

武帝太初元年五月正曆以正月為歲首色尚黃數

用五倪寬司馬遷等猶從臣諡之言公孫臣賈誼服色數

度遂順黃德彼以五德之傳從所不勝五帝相承代嘗以金木水

火相勝之法若火滅金便以火代金秦在水德故謂漢據土而克之劉

向父子以為帝出于震故憲犧氏始受木德其後以

母傳子終則復始自神農黃帝下歷唐虞三代而漢

得火焉故高祖始起神母夜號著赤帝之符旗章遂

赤自得天統矣向父子雖有此議時不施行至光武乃用火德耳

後漢光武建武二年正月始正火德色尚赤漢初土德色尚

黃至此始明火德旗幟尚赤服色於是乃正

魏文帝以漢延康元年十一月受禪給事中博士蘇

林董巴上表曰魏之氏族出自顓頊與舜同祖舜以

土德承堯之火今魏亦以土德承漢之火於行運合

於堯舜授受之次遂改延康元年為黃初元年議改

正朔易服色殊徽號承土行十二月幸雒陽以夏數

得天故卽用夏正而服色尚黃又詔以漢火行也火忌水故雒去水而加佳魏於行次爲土土水之壯也水得土而乃流土得水而柔故除佳加水變雒爲洛

明帝景初元年春正月壬辰山荏縣言黃龍見於是

有司奏以爲魏得地統空以建丑之月爲正三月定曆改年爲孟夏四月

初文皇帝卽位以受禪於漢因循漢正朔弗改帝在東宮著論

以爲五帝三王禮不相襲正朔自空改變以明受命之運及卽位優游者久之史官復著言空改乃詔三公特進九卿中郎將大夫博士議郎千石六百石博士議議者或不同帝據古典甲子詔曰夫太極運三辰五星於上元氣轉三統五行於下登降周旋終則又始故仲尼作春秋三微之月每月稱王以明三正迭相爲首今推三統之次魏等也統當以建丑之月爲正月考之洪範厥義章矣其改青龍五年三月爲景

初元年四月服色尚黃犧牲用白戎事乘黑首白馬建太

赤之旂朝會建大白之旂改太和曆曰景初曆其春夏秋冬孟仲季月雖與正歲不同至於郊祀迎氣禱

祀蒸嘗巡狩蒐田分至啓閉班宣時令中氣早晚敬授民事皆以正歲斗建爲曆數之序

初高堂隆以爲改正朔易服色

殊徽號異器械自古帝王所以神明其政變民耳目故三春稱王明三統也於是敷演舊章奏而改焉帝從其議改青龍五年春三月爲景初元年孟夏四月服色尚黃犧牲用白從地正也

齊王芳以景初三年卽位十二月詔曰烈祖皇帝以

正月棄背天下臣子永惟忌日之哀其復用夏正雖

違先帝通三統之義斯亦禮制所繇變改也又夏正

於數為得天正其以建寅之月為正始元年正月以  
建丑月為後十二月

晉武帝以太始元年即位二年九月群公奏唐堯舜  
禹不以易祚改制至於湯武各推行數宣尼答為邦  
之問則曰行夏之時輅冕之制通為百代之言蓋期  
於從政濟治不繫於行運也今大晉繼三皇之蹤踵  
舜禹之迹應天從民受禪有魏空一用前代正朔服  
色皆如有虞遵唐故事於義為弘奏可

赤考之天道其違甚矣

史臣曰晉為金行服色尚

元帝以丁丑歲稱晉王置宗廟使郭璞筮之云享二

百年自丁丑至禪代之歲年在庚申為一百四歲然

丁丑始係西晉庚申終入宋年所餘惟一百有二歲

耳璞蓋以百二之期促故婉而倒之為二百也

習鑿齒臨

終上疏曰臣每謂皇晉空越魏繼漢不應以魏後為

三恪而身微官卑無繇上達懷抱愚情三十餘年今

沉淪重疾性命難保遂長懷此當與之朽爛區區之

情切所悼惜謹力疾著論一篇寫上如左願陛下考

尋古義求經嘗之表超然遠覽不以臣微賤廢言其

所論曰或問魏武帝功蓋中夏文帝受禪於漢而吾

子謂漢終有晉豈實理乎且魏之見廢晉道亦病晉  
之臣子寧可以同此言哉答曰此乃所以尊晉也但  
絕節赴曲非嘗所悲見殊心異雖奇莫察請為子言  
焉昔漢氏失御九州殘隔三國乘間鼎峙數世干戈  
日尋流血百載雖各有偏平而其實亂也宣皇帝勢  
逼當年力制魏氏夔屈從時遂羈戎後晦明掩耀龍  
潛下位俛首重足鞠躬屏息道有不容之難躬蹈履  
霜之險可謂危矣魏武既亡大難獲免始南擒孟達

東蕩海隅西抑勁蜀旋撫諸夏摧吳人入侵之鋒掃曹爽見忌之黨植靈根以跨中嶽株群才以翼子弟命世之志既恢非嘗之業亦固景文繼之靈武冠世剋伐貳違以定厥庸席卷累益奄征西極功格皇天勳侔古烈豐規顯祚故以灼如也至於武皇遂并疆吳混一宇宙又清四海同軌二漢除三國之大害靜漢末之交爭開九域之蒙晦定千載之盛功者皆司馬氏也而推魏繼漢以晉承魏比義唐虞自託純臣豈不惜哉今若以魏有代王之德則其道不足有靜亂之功則孫劉鼎立道不足則不可謂制當年當年不制於魏則魏未曾為天下之主王道不足於曹則曹未始為一日之王矣昔共工霸有九州秦政奄平區夏鞭撻華戎尊總六合猶不見序於帝王淪沒於戰國何况暫制數州之人威行境內而已便可推為一代者乎苟以晉嘗事魏懼傷皇德拘惜禪名謂不可割則惑之甚者也何者魏囂據隴公孫帝蜀蜀隴之人雖服其後取之大義於彼何有且吳楚爭號周室未亡子文延陵不見貶絕宣皇帝官魏逼於性命舉非擇木何虧德美禪代之義不同堯舜較實定名必彰於後人各有心事胡可掩定空虛之魏以屈於

已孰若仗義而以貶魏哉夫命世之人正情遇物假之際會必兼義勇宣皇祖考立功於漢世篤爾勞思報亦深魏武超越志在傾主德不素積義險水尊宣帝與之情將何重雖形屈當年意申百世降心全已憤慨於下非道服北面有純臣之節畢命曹氏忘濟世之功者也夫成業者係於所為不係所藉立功者言其所濟不言所起是故漢高稟命於懷王劉氏乘斃於亡秦超二偽以遠嗣不論近而計功考五德於帝典不疑道於力政季無承楚之號漢有繼周之業取之既美而已德亦重故也凡天下事有可借喻於古以曉於今定之往昔而足為來證者當陽秋之時吳楚二國皆僭號之王也若使楚莊推鄒郢以尊有德闔閭舉三江以奉命世命世之君有德之主或藉之以應天或撫之而光宅彼必自係於周室不推吳楚以為代明矣况積勳累功靜亂寧眾數之所錄眾之所與不資於燕噲之授不賴於因藉之力長轡廟堂吳蜀兩斃運奇二紀而平定天下服魏武之所不能臣蕩累葉之所不能除者哉自漢末鼎沸五六十年吳魏犯順而強蜀人仗正而弱三家不能相一萬姓曠而無主夫有定天下之大功為天下之所推孰

如見推於閭人受尊於微弱配天而為帝方駕於三代豈比俛首於曹氏側足於不正即情而恒實取之而無慙何與詭事而託偽開亂於將來者乎是故故舊之恩可封魏後三恪之數不空見列以晉承漢功實顯然正名當事情體亦厭又何為虛尊不正之魏而虧我道于大通哉昔周人詠祖宗之德追述剪商之功仲尼明大孝之道高稱配天之義然后稷勤於所職聿來未以翦商異於司馬氏仕乎曹族三宗之寓於魏世矣且夫魏自君之道不正則三祖臣魏之義未盡義未盡故假塗以運高略道不正故君臣之節有殊然則弘道不以輔魏而無逆取之嫌高拱不勞汗馬而有靜亂之功者蓋勳足以王四海義可以登天位雖我德慙於有周而被道異於殷商故也今子不疑共工之不得列於帝王不嫌漢之係周而不係秦何至於一魏猶疑滯而不化哉夫欲尊其君而不知推之於堯舜之道欲重其國而反厝之於不勝之地豈君子之高義若猶未悟請於是止矣

後魏道興元年十二月詔百司議定行次尚書崔玄

伯等奏從土德服色尚黃數用五祖辰臘犧牲用白

五郊立氣宣贊時令敬授民時行夏之正時在可奏國家繼黃

帝之後宜為土德故神獸如牛牛上畜又黃色顯曜其符也於是始從土德天興中李先之子密問於先曰子今為魏臣將復事他主也先告曰未也國家政化長遠不可卒窮自始皇至齊受禪實五百餘載矣

孝文太和十四年八月詔曰丘澤初制配尚空定五

德相襲分敘有嘗然異同之論著於往漢未詳之說

疑在今史群官百辟可議其所應必令合衷以成萬

代之式中書監高閭議以為帝王之祚百代可知運

代相承書傳可稽雖祚命有長短德政有優劣至於

受終嚴祖殷薦上帝其致一也故敢述其前載舉其

大略臣聞居尊據極允應明命者莫不以中原爲正  
統神州爲帝宅苟位當名全化迹流洽則不專以世  
數爲予奪善惡爲是非故堯舜禪揖一身異尚魏晉  
相代紀運少殊桀紂至虐不廢承曆之敘厲惠至昏  
不闕周晉之祿計五德之論始自劉向一時之議三  
家致別故張蒼以漢爲水德賈誼公孫臣以爲土德  
劉向以爲火德以爲水德者正以當有水溢之應則  
不推運代相承之數也以爲土德者則以亡秦繼曆  
相卽爲次不推逆順之異也以爲火德者懸證赤帝  
斬蛇之符弃秦之暴越惡承善不以世次爲正也故

以周爲火德自茲厥後乃以爲嘗魏承漢火生土故  
魏爲土德晉承魏土生金故晉爲金德趙承晉金生  
水故趙爲水德燕承趙水生木故燕爲木德秦承燕  
木生火故秦爲火德秦之未滅皇魏未尅神州秦氏  
旣亡大魏稱制玄朔故平文之廟始稱太祖以明受  
命之證如周在岐之陽若繼晉則晉亡已久若弃秦  
則中原有寄推此而言承秦之理事爲明驗故以魏  
承秦魏爲土德又五緯表驗黃星耀彩考氏定實合  
德軒轅承土祖木事爲著矣又秦趙及燕雖非明聖  
各正號赤縣統有中土郊天祀地肆類咸秩明刑制

禮不失舊章奄岱踰河境被淮漢非若離齷邊方僭  
擬之屬遠如孫權劉備近若劉裕道成事繫蠻夷非  
關中夏伏惟聖朝德配天地道被四海承乾統曆功  
侔百王光格同於唐虞享祚流於周漢正位中境奄  
有萬方今若弁棄三家遠承晉氏則稜中原正次之  
實存之無損於此而有成於彼廢之無益於今而有  
傷於事臣愚以爲宜色尚黃定爲土德又前代之君  
明賢之史皆因其可褒褒之可貶貶之今議者偏據  
可絕之義而不錄可全之理所論事大垂之萬葉宜  
弁集中祕群儒人人別議擇其所長於理爲悉祕書

臣所以懷懷惜之惟垂察納詔令群官議之十五年  
正月侍中司空長樂王穆亮侍中尚書左僕射平原  
王陸叡侍中吏部尚書中山王王元孫侍中尚書駙  
馬都尉南平王馮誕散騎嘗侍都曹尚書新秦侯游  
明根散騎嘗侍南部令鄧侍祖祕書中散李愷尚書  
左丞郭祚右丞霸城子衛慶中書侍郎封琳中書郎  
泰昌子崔挺中書侍郎賈元壽等言臣等受勅共議  
中書監高閭祕書丞李彪等二人所議皇魏行次尚  
書高閭以石承晉爲水德燕承石爲木德以秦承燕  
爲火德大魏次秦爲土德皆以地據中夏以爲得統



之徵皇魏建號事接秦末晉既滅亡天命在我故因  
中原有寄卽而承之彪等據神元皇帝與晉武竝時  
桓穆二帝仍修舊好始自平文逮于太祖抗衡秦趙  
終平慕容晉祚終於秦方大魏興于雲朔據漢并秦  
承周之義以皇魏承晉爲水德二家之論大略如此  
臣等謹共參論伏惟皇魏世王玄朔下迄魏晉趙秦  
二燕雖地據中華德祚微淺竝獲推敘于理未愜又  
國家積德修長道光萬戴彪等職主東觀詳究圖史  
所據之理其志難奪今欲從彪等所議宜承晉爲水  
德詔曰越近承遠情所未安然考次推時頗亦難繼

臣所以悽悽惜之惟垂察納詔令群官議之十五年  
正月侍中司空長樂王穆亮侍中尚書左僕射平原  
王陸叡侍中吏部尚書中山王王元孫侍中尚書駙  
馬都尉南平王馮誕散騎嘗侍都曹尚書新秦侯游  
明根散騎嘗侍南部令鄧侍祖祕書中散李愷尚書  
左丞郭祚右丞霸城子衛慶中書侍郎封琳中書郎  
泰昌子崔挺中書侍郎賈元壽等言臣等受勅共議  
中書監高閭祕書丞李彪等二人所議皇魏行次尚  
書高閭以石承晉爲水德燕承石爲木德以秦承燕  
爲火德大魏次秦爲土德皆以地據中夏以爲得統

之徵皇魏建號事接秦末晉既滅亡天命在我故因  
中原有寄卽而承之彪等據神元皇帝與晉武竝時  
桓穆二帝仍修舊好始自平文逮于太祖抗衡秦趙  
終平慕容晉祚終於秦方大魏興于雲朔據漢并秦  
承周之義以皇魏承晉爲水德二家之論大略如此  
臣等謹共參論伏惟皇魏世王玄朔下迄魏晉趙秦  
二燕雖地據中華德祚微淺竝獲推敘于理未愜又  
國家積德修長道光萬戴彪等職主東觀詳究圖史  
所據之理其志難奪今欲從彪等所議宜承晉爲水  
德詔曰越近承遠情所未安然考次推時頗亦難繼

朝賢所議豈朕能有違奪便可依爲水德祖甲辰臘  
後周閔帝元年春正月辛丑卽天王位是日魏槐里  
獻赤雀百官奏議云帝王之興必更正朔明受之於  
天革民視聽也逮于尼父稽諸陰陽云行夏之時後  
王所不易今魏曆告終周室受命以木乘水實當行  
錄正用夏時式遵聖道惟文王誕玄氣之祥有黑水  
之讖服色烏制曰可

隋高祖受禪召崔仲方與高頴議正朔服色事仲方  
曰晉爲金行後魏爲水周爲木皇家以火承木得天  
之統又聖躬戴誕之初有赤光之瑞車服旗牲竝宜

用赤又勸帝除六官請依漢魏之舊帝皆從之開府  
盧賁奏改周代旗幟更為嘉名其青龍騶虞朱雀玄  
武千秋萬歲之旗皆賁所創也

開皇元年六月癸未詔以初受天命赤雀降祥五德  
相生赤為火色其郊及社廟衣服色之議而朝會之  
服旗幟犧牲各令尚赤戎服以黃七月乙卯帝始服  
黃百僚畢賀

唐玄宗開元中有上書請以皇家為金德者中書令  
蕭嵩奏請集百僚詳議侍中裴光庭以國家符命久  
著史策若有改易恐貽後學之誚密奏請依舊為定

乃下詔停百僚集議之事

臣欽若等言  
唐初事闕

天寶九載七

月詔曰三王繼統質文既不相襲五德承時服色遵  
於所尚至於旗嘗改制驛翰異宜所以表軍國之容  
合聲名之度事之大者安可因循而已焉國家膺推  
組之期纂黃中之曆憲章垂範運既屬於維新旗幟  
同色義必在於革故頃者俯納群議式明統緒故得  
天人致和風雨時若豈朕躬菲德克廣睿圖寶累聖  
鴻休允膺景運稽古之大既有昭明文物所資理宜  
詳正其諸衛應隊仗所用緋色幡等竝改為赤黃色  
庶克遵於通變諒有叶於從宜其諸節度使并管内

軍使等亦宜准此

九月處士崔昌上封事以國家合承周漢其周隋不合爲二王後請廢詔下尚書省集公卿議昌負獨見之明群議不屈會集賢院學士衛包抗表陳論上心遂定乃求殷周漢後爲三恪廢韓介鄜等公以昌爲左贊善大夫包爲虞部員外

十載五月諸衛幡旗色始改爲赤黃

十二載五月巳酉復以魏周隋依舊爲恪及二王後其本封韓介鄜等公如故初崔昌上封事推五行之運以皇家土德合承漢行自魏晉至隋皆非正統是

閏位書奏詔公卿議是非相半時上方希古墓道得昌疏甚與意愜宰相林甫亦以昌意爲是會集賢院學士衛包抗疏奏曰昨夜雲開四星聚於尾宿又都堂會議之際陰霧四塞緒言之後晴空萬里此蓋天意明國家承漢之象也上以爲然遂行之及是楊國忠根本林甫之短乃奏云周漢遠不當爲二王後衛包助邪獨與林甫計議大紊彝倫上疑之下包獄案鞫遂貶爲夜郎郡夜郎尉崔昌爲玉山郡烏雷尉並員外置

代宗永泰中歸崇敬爲膳部郎中時有術士巨彭祖

上疏云大唐土德千年合符請每四季郊祀天地詔禮官儒者議之崇敬議曰案舊禮立春之日迎春於東郊祭青帝立夏之日迎夏於南郊祭赤帝先立春十八日迎黃靈於中地祀黃帝秋冬各如其方黃帝於五行爲土王在四季生於火故火用事之末而祭之三季則否漢魏周隋共行此禮國家土德乘時亦以每歲六月土王之日祀黃帝於南郊以后土配所謂合禮今彭祖請用四季祠祀多憑緯候之文且據陰陽之說事涉不經恐難行用

周太祖廣順元年司天上言歷代帝王以五運相承

前朝紹承水德今國家建號周朝合以木德代水

經法國以歲暮爲臘今曆日所行合以今年十二月

二十二日丁未爲臘從之臣欽若等曰晉承後唐漢承晉本文不載承土之德

據周稱木德卽是漢爲水晉爲金以繼唐土德也

册府元龜

帝王部  
運歷

卷之四

十五

册府元龜

淮南李嗣京叅閱

西極文翔鳳訂正

象章黃國琦較釋

帝王部

五

創業

易曰雲雷屯君子以經綸孟子曰天下溺援之以道  
其創業之謂乎神農以前爲而不有功成不居故無  
得而稱焉炎帝下衰諸侯放恣蚩尤貪暴害於有衆  
黃帝修德治兵順天行罰諸侯百姓咸所欣戴遂應

土德之運而有天下非夫聰明睿智神武而不殺者其孰能與於此商周開基其義益顯湯誥曰有夏昏德民墜塗炭天乃錫王勇知表正萬邦泰誓曰予有臣三千惟一心商罪貫盈天命誅之故云為淵毆魚者鰓也為叢毆爵者鷓也為湯武毆民者桀與紂也漢魏以降豪傑竝馳莫不英謀沈斷雄圖遠馭乘時以建義任能以協力撥亂反正與民休息天人合符乃膺六寶有以知天造草昧王業之艱難也

黃帝初受國於有熊氏軒轅之丘因以為名軒轅之時神農氏世衰易稱庖犧氏沒神農氏作是為炎帝教民耕農故號曰神農諸侯

相侵伐暴虐百姓而神農氏弗能征於是軒轅乃習

用于戈以征不享諸侯咸來賓從而蚩尤最為暴莫

能伐蚩尤古天子孔子三朝記曰蚩尤庶人之貪者炎帝欲侵諸侯諸侯咸

歸軒轅軒轅乃修德振兵治五氣五行之氣執五種執樹也詩

云執之荏菹周禮曰穀宜五種鄭玄曰五種黍稷菽麥稻也撫萬民度四方度四方而

安撫教熊羆貔貅驅虎以與炎帝戰於阪泉之野阪泉

地名也三戰然後得其志蚩尤作亂不用帝命於是黃帝乃徵師諸侯與蚩尤戰於涿鹿之野涿鹿山名在涿郡又

曰在遂禽殺蚩尤皇覽曰蚩尤冢在東平郡壽張縣關鄉城中高七丈民嘗十月祀之

有赤氣出如疋絳帛名為蚩尤旗有解冢在山陽郡鍾野縣重聚大小與闕冢等傳言黃帝與蚩尤戰于

涿鹿之野黃帝殺之身體異處故別葬之而諸侯咸尊軒轅為天子代神

農氏是為黃帝天下有不順者黃帝從而征之平者

去之披山通道披他本一作披字蓋當為披披者旁其邊之謂也披語成合今世然古今

不必同也未嘗寧居東至于海登丸山丸作凡在瑯邪朱虛縣及岱

宗西至於空峒山名在隴右登鷄頭南至于江登熊湘南

至于召陵登熊山湘山在長沙益陽縣北逐葷粥匈奴傳曰唐虞以上有土戎獫狁葷粥居

於北蠻合符釜山而邑于涿鹿之阿遷徙往來無嘗處

以師兵為營衛

帝舜年二十以孝聞三十而堯問可用者四嶽咸薦

舜曰可於是堯乃以二女妻舜以觀其內使九男與

處以觀其外舜居媯汭內行彌謹堯二女不敢以貴

驕事舜親戚甚有婦道堯九男皆益篤一年而所居

成聚二年成邑三年成都堯乃試舜五典百官皆治

昔高陽氏有才子八人蒼舒隕數搏戲大臨龍降庭堅仲容叔達世得其

利謂之八凱凱和也高辛氏有才子八人伯奮仲堪叔

仲熊叔也世謂之八元元善也此十六族者世濟其美不

隕其名至於堯堯未能舉舜舉八凱使王后土君治九土

之空以撥百事莫不時序舉八元使布五教於四方父

義母慈兄友弟恭子孝內平外成昔帝鴻氏有不才

子帝鴻黃帝也不才其苗裔讎堯也掩義隱賊好行凶慝天下謂之



渾沌少皞氏金天氏也有不才子毀信惡忠崇飾惡言天

下謂之窮奇謂共工氏也其行窮而好奇顓頊氏有不才子不可

教訓不知話言天下謂之檮杌檮杌頑凶無俦匹之貌謂鯀也此三

族世憂之至于堯堯未能去縉雲氏姜姓炎帝之苗裔也有不

才子貪於飲食冒于貨賄天下謂之饕餮天下惡之

比之四凶舜賓于四門乃流四凶之族遷于四裔四裔

之地去王城四千里以禦魍魎魍魎人面獸身四足好惑人於山林異氣所生以為人害

是四門辟言母凶人也舜入於大麓烈風雷雨不迷

堯乃知舜之足授天下使舜攝行天子政巡狩堯三

年喪畢讓堯子丹朱而天下歸舜遂踐天子位

夏禹初為司空與益后稷奉帝堯命命諸侯百姓興

人徒以傳土傳作敷土也行山表木定高山大川定其差秩祀禮

所視也名山大川五嶽四瀆之屬禹傷先人父鯀功之不成受誅鯀

水九年而功弗成舜殛之乃勞身焦思居外十三年過家門不敢

入陸行乘車水行乘船泥行乘橇橇或作藪形如山箕隨行泥上

行乘橇一作橋謂以鐵如錐頭長半寸施之履下以上山不蹉跌也左準繩右規

矩左右言嘗用也載四時所行不違四時之宜也以開九州通九道陂

九澤度九山令益予衆庶稻可種卑濕命后稷予衆

庶難得之食食少調有餘相給以均諸侯禹乃行相

地宜所有以貢及山川之便利東漸於海西被于流

沙朔南暨朔北方也聲教訖於四海于是帝錫禹玄圭以

告成功於天下天下於是太平始舜薦禹於天為嗣

舜三年喪畢禹辭辟舜之子商均于陽城今潁川大陽城是

下諸侯皆去商均而朝禹禹遂即天子位

殷湯初為夏方伯得專征伐葛伯不祀湯始伐之孟

日湯居亳與葛伯為隣地里志曰葛今梁國寧陵之葛鄉湯曰予有言人視水見

形視民知治不伊尹曰明哉言能聽道乃進君國子

民為善者皆在王官勉哉勉哉湯曰汝不能敬命予

人罰殛之無有攸赦作湯征當是時夏桀為虐政淫

荒而諸侯昆吾氏為亂湯乃興師率諸侯伊尹從湯

湯自把鉞以伐昆吾遂伐桀湯曰格汝眾庶來女悉

聽朕言匪台小子台我敢行舉亂有夏多罪予惟聞

女眾言夏氏有罪予畏上帝不敢不正不敢不正桀之罪而誅之

今夏多罪天命殛之今女有眾女曰我君不恤我眾

舍我嗇事而割政奪民農功而為割剝之政女其曰有罪其奈何

夏王率止眾力率奪夏國桀之君臣相率遏止眾力使不得事農相率割剝夏

之邑有眾率怠不和眾民相率怠曰是日何時喪予

與女皆亡尚書大傳曰桀云天之有日猶吾之有民日有亡哉日亡吾亦亡矣夏德若

茲今朕必往爾尚及予一人致天之罰予其大理女

尚書理字作女母不信朕不食言女不從誓言予則

孥戮女無有攸赦以告令師作湯誓於是湯曰吾甚

武號曰武王詩曰武王載旆有虔秉鉞毛萇曰武王湯也桀敗於有緘之

羑桀犇於鳴條夏師敗績湯遂伐三二臣作典寶一篇言國之嘗寶一夏

國名桀走保之今義伯仲伯作典寶湯既勝夏欲遷其社不可欲變置社稷而後世無及句龍者故不可而止

也言夏社不可遷之義伊尹報一云伊尹報政於是諸侯畢服湯

乃踐天子位平定海內

周文王為西伯崇侯虎譖於紂紂乃囚西伯於羑里

囚天之徒患之乃求有莘氏美女驪戎之文馬有熊

九駟他奇怪物因商嬖臣費仲而獻之紂紂大悅曰

此一物足以釋西伯况其多乎乃赦西伯賜之弓矢

斧鉞使得征伐西伯乃獻雒西之地以請去炮烙之

刑紂許之西伯陰行善諸侯皆來決平於是虞芮之

人地里志虞在河東太陽縣芮在馮切臨晉縣有獄不能決乃如周入界

耕者皆讓畔民俗皆讓長虞芮之人未見西伯皆慙

相謂曰吾所爭周人所恥何往為祇取辱耳遂還俱

讓而去諸侯聞之曰西伯乃受命之君明年伐犬戎

山海經曰有人人面獸身名曰犬戎明年伐密須密須氏姑姓之國安定陰密縣是明

年敗耆國一作殷之祖伊聞之懼以告帝紂紂曰不

有天命乎是何能為明年伐邠邠城在野王縣西北音于明年伐

册府元龜帝王部卷之五

崇侯虎而作豐

豐在京北鄆縣東有靈臺去長安南數十里

自岐山而徙

都豐時文王之道被于南國美化行乎江漢之域無

思犯禮求而不可得也

紂時淫風徧于天下維江漢之域先受文王之教化故

有漢廣之詩言德廣及也文王之化行乎汝墳之國

婦人能閔其君子猶勉之以正也

言此婦人被文王之化厚事其君子

故有汝墳之詩言其道化行也衰亂之俗微貞信之

教興彊暴之男不能侵陵貞女

衰亂之俗微貞信之教興者此殷之末世

周之盛德當文王與紂之時

故有行露之詩周南之國化文王之

政在位皆節儉正直德如羔羊

羔羊之化在位卿大夫競相從化皆如羔

羊故有羔羊之詩召南之國被文王之化男女得以

及時故有標有梅之詩天下大亂彊暴相陵遂成淫

風被文王之化雖當亂世猶惡其無禮故有野有死

麇之詩鵲巢之化行人倫既正朝廷既治天下純被

文王之化則庶類蕃殖蒐田以時仁如騶虞則王道

成也故有騶虞之詩文王之用師率殷之叛國以事

紂養是闇昧之君以佐其惡是周道大興而天下大

歸往矣故酌之詩曰於鑠王師遵養時晦時純熙矣

是用大介

鑠美遵率養取晦昧也介助也

太子發立是為武王武王

卽位太公望為師周公旦為輔召公畢公之徒左右

王師脩文王緒業九年武王上祭于畢

畢文王墓地名也東

觀兵至于盟津

譙周云史記武王十一年東觀兵十二年尅紂

為文王木主

載以軍中車武王自稱太子發言奉文王以伐不敢

自專乃告司馬司徒司空諸節

諸節謂諸受持節有司也

齊粟信

哉予無知以先祖有德臣小子受先功

一云予小子受先公功

畢立賞罰以定其功遂興師師尚父號曰總爾眾庶

與爾舟楫後至者斬武王渡河中流白魚躍入于王

舟中

魚者介鱗之物兵象也白者殷家之正色言殷之兵眾與周之象也

武王俯取以

祭既渡有火自上復于下至于王屋流為烏其色赤

其聲魄

王屋王所居屋流行也魄然安定意也書說云烏有孝名武王率父大業故烏瑞臻赤者

周之正色也

是時諸侯不期而會盟津者八百諸侯皆曰

紂可伐矣武王曰女未知天命未可也乃還師歸居

二年聞紂昏亂暴虐滋甚殺王子比干囚箕子太師

庇少師強抱其樂器而犇周於是武王徧告諸侯曰

殷有重罪不可以不畢伐

一作減

乃遵文王遂率戎車

三百乘虎賁三千人

虎賁勇士稱也若虎賁言其勇也

甲士四萬五

千人以東伐紂十一年十二月戊午師畢渡盟津諸

侯咸會曰孳孳無怠武王乃作太誓告于眾庶今殷

王紂乃用其婦人之言自絕于天毀壞其三正

動逆天地

人離過其王父母弟

王父母弟祖父父母之族必言母弟舉親者言之也

乃斷

棄其先祖之樂乃為淫聲用變亂正聲怡悅婦人故

今予發維其行天罰勉哉夫子夫子丈夫之稱不可再不可

三二月一作正此建丑之月殷之正月周之二月也甲子昧爽昧冥爽明

武王朝至於商郊牧野乃誓癸亥夜陳甲子朝誓之武王左杖

黃鉞右秉白旄鉞以黃金飾斧左手杖鉞示無事於誅右手把旄示有事於教令以

麾曰遠矣西土之人嗟我有國家君冢大司徒司馬

司空亞旅師氏亞次旅衆大夫也其位次卿師氏大夫官以兵守門千夫長百

夫長師率卒率及庸蜀羌髳微纘彭濮人八國皆蠻夷戎狄羌在西蜀予

微在巴蜀纘彭在西北庸濮在江漢之南纘一作盧稱爾弋稱舉也比爾干立爾

予予其誓王曰古人有言牝雞無晨牝雞之晨惟家

之索索盡也婦人知外事唯代唯鳴則家盡也今殷王紂維婦人言是用

自棄其先祖肆祀不答肆祭名答報也昏棄其家國遺其王

父母弟不用乃維四方之多罪逋逃是崇是長是信

是使言紂棄其賢臣而尊長逃亡罪人信用之也俾暴虐于百姓以茲究

于商國今予發維其行天之罰今日之事不過六步

七步乃止齊焉今日戰士不過六步七步乃比相齊言當旋進一心也夫子勗

哉不過于四伐五伐六伐七伐乃止齊焉伐謂擊刺也少則四

五多則六七以爲例也勉哉夫子尚桓桓如虎如罴如豺如離

此訓與于商郊不禦克犇以役西土禦疆禦謂疆暴也克殺也不得

暴殺紂師之犇走者當以爲周之役也勉哉夫子爾所不勉其於爾躬

有戮誓已諸侯兵會者車三千乘陳師牧野帝紂聞

武王來亦發兵七十萬人距武王武王使師尚父與

百夫致師周禮環人掌致師鄭玄曰致師者致其必戰之志也古者將戰先陳勇力之士犯敵

焉春秋傳曰楚許伯御樂伯攝叔為右以致晉師許

伯曰吾聞致師者御靡旌摩壘而還樂伯曰吾聞致

師者左射以藪代御執轡御下兩馬掉鞍而還攝叔

曰吾聞致師者右入壘折馘執俘而還皆行其所聞

而以大卒馳帝紂師帝一作商紂師雖眾皆無戰之心

欲武王亟入紂師皆倒兵以戰以開武王武王馳之

紂兵皆潰畔紂紂走反入登于鹿臺之上蒙衣其珠

玉自燔于火而死武王持大白旗以麾諸侯諸侯畢

拜武王武王乃揖諸侯諸侯畢從武王至商國商國

百姓咸待於郊於是武王使群臣告語商百姓曰上

天降休商人皆再拜稽首武王亦答拜入至紂死所

武王自射之三發而後下車以輕劍擊之以黃鉞斬

紂頭縣大白之旗已而致紂之嬖妾二女二女皆經

自殺武王又射三發擊以劍斬以玄鉞司馬法曰夏

日玄鉞用鐵不磨礪縣其頭小白之旗武王已乃出復軍其明

日除道修社及商紂宮及期百夫荷罕旗以先蔡邕

日前驅有九旒雲罕東京賦武王弟叔振鐸奉陳嘗

日雲罕九旒薛綜曰旒旗名軍周公旦把大鉞畢公把小鉞以夾武王散宜生太

顛閎夭皆執劍以衛武王既入立于社南大卒之左

右畢從毛叔鄭奉明水周禮曰司烜氏以鑑取水於月鄭玄曰鑑鏡屬也取月之

水欲得陰陽之潔氣

衛康叔封布茲

茲者藉席之名諸侯病曰負茲

召公奭贊采師尚父牽牲尹佚筮祝曰殷之末孫季

紂殄廢先王明德侮蔑神祇不祀昏暴商邑百姓其

章顯聞于天上帝於是武王再拜稽首曰膺大命

革殷受天明命武王又再拜稽首乃出封商紂子祿

父殷之餘民武王為殷初定未集乃使其弟管叔鮮

蔡叔度相祿父治殷已而命召公釋箕子之囚命畢

公釋百姓之囚表商容之閭命南宮括散鹿臺之財

發鉅橋之粟以賑貧弱萌隸命南宮括史佚展九鼎

保玉保玉作寶命閎夭封比干之墓命宗祝享祠于軍乃

罷兵西歸行符記事作武成

武成

諸侯班賜宗彝

作分殷之器物

漢高祖初為泗上亭長為縣送徒驪山

秦始皇葬驪山故郡國送

徒士徒多道亡自度比至皆亡之到豐西澤中夜皆

解縱所送徒縱放也曰公等皆去吾亦從此逝矣

逝往也

徙中壯士願從者十餘人秦二世元年秋七月陳涉

起蕪音機縣名屬沛國至陳自立為楚王郡縣多殺長吏以

應涉九月沛令欲以沛應之掾主吏蕭何曹參

參為掾何

為主曰君為秦吏今欲背之沛子弟恐不聽願君召

諸亡在外者可得數百人因以劫眾

劫謂威脅之

眾不敢



不聽乃令樊噲召高祖高祖之眾已數百人矣於是樊噲從高祖來沛令後悔恐其有變乃閉城城守音符

守其城也欲誅蕭曹蕭曹恐踰城保高祖保安也就高祖以自安高

祖乃書帛射城上與沛父老曰天下同苦秦久矣今

父老雖為沛令守諸侯竝起今屠沛屠謂破取城邑誅殺其人如屠

六畜沛今共誅令擇可立立之以應諸侯即室家完

不然父子俱屠無為父老乃帥子弟共殺沛令開城

門迎高祖欲以為沛令高祖曰天下方擾諸侯竝起

今置將不善一敗塗地謂肝腦塗地也吾非敢自愛恐能薄

能才也本獸名能行鹿足堅中強力故人有才者皆為能也不能完父兄子弟此

大事願更擇可者蕭曹皆文吏自愛恐事不就後秦

種族其家謂誅及種族也盡讓高祖諸父老皆曰平生所聞

劉季奇怪當貴卜筮之莫如劉季最吉高祖數讓眾

莫肯為高祖乃立為沛公祠黃帝祭蚩尤於沛廷而

釁鼓釁血祭也凡殺牲以血祭者皆為釁於是少年豪吏如蕭曹樊噲

等皆為收沛子弟得三千人是月項梁與兄子羽起

吳田儵與從弟榮橫起齊自立為齊王韓廣自立為

燕王魏咎自立為魏王二世二年十月十月秦正月也沛公

攻胡陵屬山陽方輿音房預亦山陽還守豐秦泗州監平將

兵圍豐泗州今沛郡秦時御史監郡平其名也三日出與戰破之令雍

冊封元龜 帝王部 卷之五 十二

齒守豐十一月沛公引兵之薛秦泗州守壯兵敗於

薛秦時郡置守尉監此泗州有監有守壯其名也走至戚屬東海沛公左司馬

得殺之得司馬名也沛公還軍亢父亢音抗父音甫屬任抗城至方與

十二月雍齒反為魏守豐魏人周市略地豐沛雍齒不欲屬沛公故為魏守

沛公攻之不克正月東陽寧君秦嘉寧君秦嘉二人寧姓時號為君

立景駒為楚王在留留縣名沛公往從之道得張良遂

與俱見景駒請兵以攻豐時章邯從陳別將從謂進計也

司馬尼將兵北定楚地尼古夷字章邯司馬也屠相至碭碭縣名

郡名東陽寧君沛公引兵西與戰蕭西蕭縣之西不利還收

兵聚留二月攻碭三日拔之收碭兵得六千人與故

合九千人三月攻下邑拔之下邑縣名還擊豐不下四月

項梁擊殺景駒秦嘉止薛沛公往見之項梁益沛公

卒五千五大夫將十人五大夫第九爵名沛公還引兵攻豐

拔之雍齒奔魏六月沛公如薛如往也與項梁共立楚

懷王孫心為楚懷王六國為秦所并楚最無罪故求其後立之以祖謚為號順民望

也沛公攻亢父章邯圍田榮於東阿沛公與項梁共

救田榮大破章邯東阿田榮歸沛公項羽追北北敗也

至城陽攻屠其城軍濮陽東復與章邯戰又破之章

邯復振振起也振迅而起守濮陽環水沛公項羽去攻定陶

八月田榮立田儋子市為齊王定陶未下沛公與項

羽西略地至雍丘與秦軍戰大破之斬三川守李繇  
 還攻外黃外黃未下章邯擊項梁九月沛公項羽方  
 攻陳留聞梁死士卒恐乃與將軍呂臣引兵而東徙  
 懷王自盱台都彭城台音怡呂臣軍彭城東項羽軍彭  
 城西沛公軍碭後九月即閏九月懷王并呂臣項羽軍自  
 將之以沛公為碭郡長封武安侯將碭郡兵初懷王  
 與諸將約先入定關中者王之當是時秦兵彊嘗乘  
 勝逐北諸將莫利先入關不以入關為利言畏秦也獨羽怨秦破  
 項梁奮勢願與沛公西入關懷王諸老將皆曰項羽  
 為人慄悍禍賊慄疾悍勇好為禍害而殘賊也嘗攻襄城襄城無噍

類噍音碎笑反言無有活而噍食者也所過無不殘滅且楚數進取前

陳王項梁皆敗陳王陳涉也不如更遣長者扶義而西扶

也亦告諭秦父兄秦父兄苦其主久矣今誠得長者

往毋侵暴空可下項羽不可遣獨沛公素寬大長者

卒不許羽而遣沛公西收陳王項梁散卒乃道碭至

陽城與扛里二縣名扛音江攻秦軍壁破其二軍三年十月

沛公攻破東郡尉於武成尉郡都尉也本謂之郡尉至景帝時改曰都尉十

二月沛公引兵至栗沛郡縣遇剛武侯應邵注云楚懷王將剛侯陳武

又云魏將柴武也孟康皆非之顏師古云史失其名姓唯識爵號臣欽若等曰剛武未詳官爵名氏奪其軍四千人并之與魏將皇欣武滿軍合攻秦軍破

之二月沛公從碭北攻昌邑遇彭越越助攻昌邑未

下三月攻開封未拔西與秦將楊熊會戰白馬縣名屬東

郡又戰曲遇東曲音丘羽反大破之楊熊走之滎陽

二世使使斬之以徇四月南攻潁川屠之因張良遂

略韓地時趙別將司馬卬卬音五剛反方欲渡河入關沛

公乃北攻平陰絕河津南戰雒陽東軍不利從轅轅

至陽城攻軍中馬騎六月與南陽太守齧戰犍東犍縣

名也齧音又破之畧南陽郡南陽守走保城守宛沛

公用其舍人陳恢言受齧降封為殷侯引兵西無不

下者至丹水高武侯鯁襄侯王陵降還攻朝陽遇番

君別將梅銷番音婆銷音呼玄反與偕攻析酈縣名析今內鄉酈故菊潭

皆降所過毋得鹵掠秦民喜遣魏人甯昌使秦八月

沛公攻武關趙高殺二世使人來約分王關中沛公

不許又擊破秦嶢關軍漢元年十月張倉傳云高祖以十月至霸上

故因秦以十月沛公至霸上秦王子嬰素車白馬係頸

以組封皇帝璽符節降軹道旁軹道亭名諸將或言誅秦

王沛公曰始懷王遣我固以能寬容且人已服降殺

之不祥乃以屬吏遂西入咸陽欲止宮休舍樊噲張

良諫乃封秦重寶財物府庫還軍霸上蕭何盡收秦

丞相府圖籍文書十一月召諸縣豪傑曰父老苦秦

苛法久矣誹謗者族偶語者棄市

偶對也

吾與諸侯約

先入關中者王之吾當王關中與父老約法三章耳  
殺人者死傷人及盜抵罪餘悉除去暴秦法吏民皆  
按堵如故凡吾所以來爲父兄除害非有所侵暴毋  
恐且吾所以軍霸上待諸侯至而定要束耳乃使人  
與秦吏行至縣鄉邑告諭之秦民大喜爭持牛羊酒  
食獻享軍士沛公讓曰倉粟多不欲費民民又益喜  
惟恐沛公不爲秦王或說沛公曰秦富十倍天下地  
形疆今聞章邯降項羽羽號曰雍王王關中卽來沛  
公恐不得有此可急使守函谷關毋內諸侯軍稍微

關中兵以自益距之沛公然其計從之十二月項羽  
果率諸侯兵欲西入關關門閉聞沛公已定關中羽  
大怒使黥布等攻破函谷關遂至戲下亞夫范增說  
羽曰沛公居山東時貪財好色今聞其入關珍物無  
所取婦女無所幸此其志不小吾使人望其氣皆爲  
龍成五色此天子氣急擊之勿失於是饗士旦日合  
戰沛公用項伯張良謀來謝得免項羽使報懷王懷  
王曰如約謂令沛公項羽怒陽尊懷王爲義帝自立  
爲西楚霸王更立沛公爲漢王王巴蜀漢中漢王怒  
羽之背約欲攻之丞相蕭何諫乃止夏四月諸侯罷

戲下各就國羽使卒三萬人從漢王楚子諸侯人之  
慕從者數萬人從杜南入蝕中蝕音力入漢中川谷名張良辭

歸韓漢王遂至褒中因說漢王燒絕棧道以備諸侯  
盜兵且示項羽無東意漢王既至南鄭諸將及士卒  
皆歌謳思東歸多道亡還者韓信為治粟都尉亦亡  
去蕭何追還之因薦於漢王曰必欲爭天下非信無  
可與計事者於是漢王齋戒設壇場拜信為大將軍  
問以計策信對曰項羽背約而王君王於南鄭是遷  
也吏卒皆山東之人日夜企而望歸及其鋒而用之  
可以有大功天下已定民皆自寧不可復用不如決

策東向因陳羽可圖三秦易并之計漢王大悅遂聽  
信策部署諸將留蕭何收巴蜀租給軍糧食五月漢  
王引兵從故道出襲雍雍王邯迎擊漢陳倉雍兵敗  
還走戰好畤又大敗走廢丘漢王遂定雍地東如咸  
陽引兵圍雍王廢丘而遣諸將略地項羽聞漢王并  
關中而齊梁畔之羽大怒乃以故吳令鄭昌為韓王  
距漢令蕭公角擊彭越越敗角兵時張良徇韓地遺  
羽書曰漢欲得關中如約即止不敢復東羽以故無  
西意而北擊齊九月漢王遣將軍薛歐王吸出武關  
因王陵兵從南陽迎太公呂后於沛羽聞之發兵距

之陽夏不得前二年十月項羽使九江王布殺義帝  
 於郴十一月漢王還都雒陽使諸將畧地二月癸未  
 令民除秦社稷立漢社稷三月為義帝發喪袒而大  
 哭發使告諸侯擊楚之殺義帝者四月田榮弟橫收  
 得數萬人立榮子廣為齊王羽雖聞漢東既擊齊欲  
 遂破之而後擊漢漢王以故得却五諸侯兵恒山河南魏韓  
 也殷東伐楚到外黃彭越將三萬人歸漢漢王拜越為  
 魏相令定梁地漢王遂入彭城收其貨賂美人日置  
 酒高會羽乃從蕭晨擊漢軍而東至彭城日中大破  
 漢軍早擊之至日中大破漢軍皆走追之穀泗水二水皆在沛郡彭城地

漢軍皆南走山走趣也楚又追擊至靈壁東睢水上睢音

雖漢軍卻為楚所擠擠排也又音子奚反多殺漢卒十餘萬皆

入睢水睢水為之不流殺人多填於水中漢王乃與數十騎

遁去太公呂后聞求漢王問行而求之反遇楚軍楚軍與

歸羽嘗置軍中呂后兄周呂侯將兵居下邑漢王從

之稍收士卒軍碭蕭何發關中老弱未傅者詣軍傳著

也音附言著於名籍給公家徭役也韓信亦收兵與漢王會漢兵復大

振與楚戰滎陽南京索間破之築甬道屬河以取敖

倉粟魏王豹謁歸視親疾至則絕河津反為楚六月

漢王還櫟陽八月如滎陽以韓信為左丞相與曹參

灌嬰俱擊魏九月信等虜魏王豹定魏地信使人請  
 兵三萬願以北舉燕趙東擊齊南絕楚糧道漢王與  
 之三年十二月黥布歸漢漢王俱收兵至成臯項羽  
 數侵奪甬道漢軍乏食四月漢王請和割滎陽以西  
 為漢羽欲聽之歷陽侯范增曰漢易與耳今不取後  
 必悔之羽乃急圍滎陽漢王患之用陳平計以黃金  
 四萬斤間疏楚君臣項羽果疑范增增增大怒而去五  
 月漢將軍紀信詐為漢王出降以誑楚軍故得由滎  
 陽至成臯自成臯入關收軍復軍成臯八月臨河南  
 鄉軍小脩武欲復戰郎中鄭忠說止漢王高壘深塹

勿戰漢王聽其計使盧綰劉賈將卒二萬人騎數百

渡白馬津入楚地佐彭越燒楚積聚

所畜軍糧芻藁之屬

復擊

破楚軍燕郭西

燕縣名古南燕國

攻下睢陽外黃十七城四

年十月漢王項羽相與臨廣武之間而語羽欲與漢

王獨身挑戰漢王數羽

數責其罪也

曰吾始與羽俱受命

懷王曰先定關中者王之羽負約王我於蜀漢罪一

也羽矯殺卿子冠軍自尊罪二也

卿子時人相褒尊之意猶言公子也

時宋義為上將軍故言冠軍矯詐也

羽當以救趙還報而擅劫諸侯兵

入關罪三也懷王約入秦無暴掠羽燒秦宮室掘始

皇帝冢收私其財罪四也又彊殺秦降王子嬰罪五



也詐坑秦子弟新安二十萬王其將章邯等罪六也

皆王諸將善地而徙逐故主令臣下爭畔罪七也出

逐義帝彭城白都之奪韓王地并王梁楚多自與罪

八也使人陰殺義帝江中罪九也夫為人臣而殺其

主殺其已降為政不平主約不信天下所不容大逆

無道罪十也吾以義兵從諸侯誅殘虐使刑餘罪人

擊公言輕何苦乃與公挑戰羽大怒伏弩射中漢王

漢王因馳入成臯羽為高俎置太公其上高俎几之上也俎者

所以薦肉示欲告漢曰今不急下吾亨太公漢王曰

吾與若俱北面受命懷王約為兄弟吾翁即汝翁翁

父也必欲亨迺翁幸分我一杯羹迺亦汝也古者以杯

耳者羽怒欲殺之項伯曰天下事未可知且為天下

者不顧家雖殺之無益但益怨耳羽從之十一月漢

王西入關至櫟陽留四日復入廣武八月項羽食盡

韓信又進兵擊楚漢使侯公說羽乃與漢約中分天

下割洪溝以西為漢洪溝在櫟陽東南二十里以東為楚九月歸

太公呂后羽解而東歸五年十月漢王追項王至陽

夏南上軍與齊王韓信魏相國越期會擊楚十一月

劉賈入楚地圍壽春十二月圍羽垓下羽夜聞漢軍

四面皆楚歌知盡得楚地羽與數百騎走以是兵大

敗灌嬰追斬羽東城楚悉定獨魯不下漢王引天下兵欲屠之為其守節禮義之國乃持羽頭示其父兄魯乃降詔曰兵不得休八年萬民與苦甚也今天下事畢其赦天下殊死已下

與讀曰預言相干與

魏太祖初為典軍較尉後漢中平六年董卓既廢弘農王而立獻帝京都大亂表太祖為驍騎將軍欲與計事太祖乃變易姓名間行東歸卓歸遂殺太后及

弘農王太祖至陳留散家財合義兵將以誅卓冬十

二月始起兵已吾

已吾縣名屬陳留郡世語曰陳留孝廉衛茲以家財資太祖始起兵

有衆五千初平元年正月後將軍袁術冀州牧韓馥豫

州刺史孔伷兖州刺史劉岱河內太守王康渤海太

守袁紹陳留太守張邈東郡太守橋瑁山陽太守袁

遺濟北相鮑信俱同時起兵衆各數萬討董卓紹問

太祖曰若事不輯則方面何所可據公曰足下意以

為何如紹曰吾南據河北阻燕代兼夷狄之衆南向

以爭天下庶可以濟乎公曰吾任天下之智力以道

御之無所不可推紹為盟主於是太祖行奮武將軍

二月卓聞兵起乃徙天子都長安卓留屯雒陽遂焚

宮室是時紹屯河內邈岱瑁遺屯酸棗術屯南陽伷

屯潁川馥屯鄴卓兵彊紹等莫敢先進太祖曰舉義

兵以誅暴亂大衆已合諸君何疑向使董卓聞山東兵起倚王室之重據二周之險東向以臨天下雖以無道行之猶足爲患今焚燒宮室劫遷天子海內震動不知所歸此天亡之時也一戰而天下定矣不可失也遂引兵西將據成臯邈遣將衛茲分兵隨太祖到滎陽汴水遇卓將徐榮與戰不利士卒傷死甚多太祖爲流矢所中所乘馬被創從弟洪以馬與太祖得夜遁去榮見太祖所將兵少力戰盡日謂酸棗未易攻也亦引兵還太祖到酸棗諸軍兵十餘萬日置酒高會不圖進取太祖責讓之因爲謀曰諸軍聽吾

計使渤海引河內之衆臨孟津酸棗諸將守成臯據

敖倉塞輟轅大谷全制其險使袁將軍率南陽之軍

臣欽若等曰袁將軍紹也

軍丹析入武關以震三輔皆高壘深壁

勿與戰益爲疑兵示天下形勢以順誅逆可立定也

今兵以義動持疑而不進失天下之望竊爲諸君恥

之邈等不能用太祖兵少乃與夏侯惇等詣揚州募

兵刺史陳温丹陽太守周昕與兵四千餘人還到龍

亢士卒多叛至銍建平復收兵得千餘人進屯河內

劉岱與橋瑁相惡岱殺瑁以王肱領東郡太守袁紹

與韓馥謀立幽州牧劉虞爲帝太祖拒之二年七月

黑山賊于毒白繞睢固等

睢音申 隨反

十餘萬眾略魏郡

東郡王肱不能禦太祖引兵入東郡擊白繞於濮陽破之袁紹因表太祖為東郡太守三年春擊睢固又大破之青州黃巾眾百萬入兗州殺任城相鄭遂轉入東平劉岱與戰為賊所殺鮑信與州吏萬潛等至東郡迎太祖領兗州牧遂進兵擊黃巾於壽張東破之追至濟北乞降冬受降卒三十餘萬男女百餘萬口收其精銳者號為青州兵四年春太祖軍鄆城袁術與紹有隙荊州牧劉表斷術糧道術引兵入陳畱屯封丘使將劉祥屯長垣太祖擊祥術救之與戰大

破之興平元年夏使荀彧程昱守鄆城太祖征陶謙拔五城遂略地至東海會張邈與陳宮叛迎呂布郡縣皆應布攻鄆城不能下西屯濮陽太祖圍之濮陽大姓田氏為反間太祖得入城燒其東門示無反意及戰軍敗布騎得太祖而不知是問曰曹操何在太祖曰乘黃馬走者是也布騎乃釋太祖而追黃馬者門火猶盛太祖突火而出復進軍攻之與布相守百餘日九月太祖還鄆城布到乘氏為其縣人李進所破二年春太祖襲定陶濟陰太守吳資保南城未拔會布至又擊破之建安元年七月楊奉韓暹以天子

還雒陽太祖遂至雒陽衛京都天子假太祖節鉞錄  
尚書事雒陽殘破董昭等勸太祖都許九月車駕出  
轅轅而東以太祖爲大將軍封武平侯二年九月袁  
術侵陳太祖東征破之術走渡淮三年九月東征呂  
布屠彭城獲其相侯諧進至下邳布自將騎逆擊大  
破之追至城下用荀攸郭嘉計决泗沂水以灌城月  
餘布將宋憲等執陳宮舉城降生擒布宮皆殺之四  
年春張楊將楊醜殺楊睦固又殺醜以其衆屬袁紹  
屯射犬射犬地名太祖進軍臨河因使楊故長史薛洪河  
內太守繆尚畱守自將兵北迎袁紹太祖遂濟河圍

射犬洪尚率衆降五年十月破袁紹於官渡乃上言  
曰大將軍鄴侯表紹前與冀州牧韓馥立故大司馬  
劉虞刻作金璽遣故任長畢瑜詣虞爲說命錄之數  
又紹與臣書曰可都鄆城當有所立擅鑄金銀印孝  
廉計吏皆往詣紹從弟濟陰太守敘與紹書云今海  
內喪敗天意實在我家神應有徵當在尊兄南兄臣  
下欲使卽位南兄言以年則北兄長以位則北兄重  
便欲送璽會曹操斷道紹宗族累世受國重恩而凶  
逆無道乃至如此輒勒兵馬與戰官渡乘聖朝之威  
得斬紹大將淳于瓊等紹衆大潰棄軍渡河遂收其

輜重圖書珍寶虜其衆六年九月南征劉備備聞太  
祖自行走奔劉表七年五月表紹死小子尚代九月  
太祖征之連戰尚敗八年三月攻其郭大破之尚夜  
遁九年四月尚將沮鵠守邯鄲沮音菹太祖擊拔之十  
年正月攻袁譚平冀州四月黑山賊張燕率其衆十  
餘萬降十一年正月征高幹平壺關十二年七月引  
軍出盧龍塞外使張遼為先鋒虜衆大潰斬蹋頓及  
名王已下胡漢降者二十餘萬口十三年七月征劉  
表表卒其子琮代屯襄陽九月太祖到新野琮遂降  
十七年正月天子命太祖贊拜不名入朝不趨劔履

上殿十八年五月天子使御史大夫郗慮持節策命  
為魏公七月始建魏社稷宗廟二十一年五月進爵  
為王二十五年正月文帝即位追尊武皇帝廟號太  
祖

文帝太祖太子後漢建安十六年為五官中郎將副  
丞相二十二年為魏太子二十五年嗣位為丞相魏  
王改元延康元年五月馮翊山賊鄭甘王炤率衆降  
六月辛亥治兵于東郊庚午遂南征七月孫權遣使  
奉獻蜀將孟達率衆降武都民王楊僕率種人內附  
居居十一月遂受漢禪

九斤  
元龜  
創業  
卷之五

冊府元龜

淮南李嗣京參閱

西極文翔鳳訂正

豫章黃國琦較釋

帝王部 六

創業第二

晉宣帝司馬氏後漢京兆尹防之子

臣欽若等曰自防以下事迹具

帝土帝系門

建安中魏太祖為漢丞相辟文學掾轉東曹

屬又轉為主簿從討張魯又從征孫權破之魏國建

遷太子中庶子女帝即王位以帝為丞相長史封河

冊府元龜

帝王部

卷之六

津亭侯及魏受漢禪以帝爲尚書黃初二年遷侍中  
尚書右僕射文帝疾篤帝與曹真等竝受顧命輔政  
明帝卽位改封舞陽侯孫權圍江夏遣其將諸葛瑾  
張霸并攻襄陽帝督諸軍討權走之進擊敗瑾斬霸  
并首級千餘遷驃騎將軍太和元年蜀降將孟達領  
新城太守連吳固蜀潛圖中國帝發書喻之達猶豫  
不決帝潛軍進討倍道兼行八日到其城下八道攻  
之旬有六日達甥鄧賢將李輔等開門出降遂斬達  
首傳京師四年加大將軍大都督假黃鉞與曹真伐  
蜀帝自西城斫山開道水陸竝進沂沔而上至于胸

臆

胸音蠢臆音如允反地名

拔其新豐縣軍次丹口遇雨班師五

年蜀將諸葛亮寇天水乃使帝西屯長安都督雍梁  
二州諸軍事統車騎將軍張郃後將軍費曜征蜀進  
次漢陽與亮相遇亮退追至祁山亮屯鹵城據南北  
二山斷水爲重圍帝攻拔其圍亮宵遁追擊破之俘  
斬萬計青龍二年亮又率衆十餘萬出斜谷壘于郿  
之渭水南原天子遣征蜀護軍秦朗督步騎二萬受  
帝節度帝與亮相會于積石臨原而戰亮不得進還于  
五丈原帝遣奇兵犄亮之後斬五百餘級獲生口千  
餘降者六百人會亮死其部將楊儀魏延爭權儀斬



延并其衆帝欲乘隙而進有詔不許三年遷太尉蜀將馬岱入寇帝遣將軍牛金擊走之景初二年率胡遵等步騎四萬伐公孫文懿于遼東與賊營相逼會霖潦大水平地數尺三軍恐欲移營帝令軍中敢有言徙者斬都督令史張靜犯令斬之軍中乃定尋戰而克之明帝末與大將軍曹爽並受遺詔輔少主齊王卽帝位遷帝侍中持節都督中外諸軍錄尚書事與大將軍曹爽各統兵三千人共執朝政爽欲使尚書奏事先繇已乃言於天子徙帝爲大司馬朝議以爲前後大司馬累薨於位乃加大傅入殿不趨贊拜

不名劔履上殿正始二年吳人入寇帝督諸軍南徙車駕送出津陽門帝以南方暑濕不宜持久使輕騎挑之然不敢動於是休戰士簡精銳募先登申號令示必攻之勢吳軍夜遁走追至三洲口斬獲萬餘人收其舟船軍資而還天子遣侍中嘗侍勞軍于宛嘉平元年正月天子謁高陵爽兄弟皆從是日太白襲月帝乃奏永寧太后廢爽兄弟有司劾黃門張當并發爽與何晏等反事乃收爽兄弟及其黨誅之二月天子以帝爲丞相三年八月薨長子師次子昭繼爲大將軍輔政晉國建追尊宣王武帝受禪追尊號曰

宣皇帝景帝宣帝長子魏景初中拜散騎嘗侍累遷中護軍宣帝之誅曹爽也深謀祕策與帝潛畫初帝陰養死士三千散在人間至是一朝而集衆莫知其所出事平以功封長平鄉侯加衛將軍及宣帝薨議者咸云伊尹既卒伊陟嗣事天子命帝以撫軍大將軍輔政嘉平四年遷大將軍加侍中持節都督中外諸軍錄尚書事命百官舉賢良明少長卹窮獨理廢滯四海傾注朝野肅然或有請改易制度者帝曰不識不知順帝之則詩人之美也三祖典制所宜遵奉自非軍事不得妄有改革五年五月吳太傅諸葛恪

圍新城帝使鎮東將軍毋丘儉揚州刺史文欽等距破之正元元年正月天子與中書令李豐后父光祿大夫張緝黃門監蘇鑠永寧署令樂敦冗從僕射劉寶賢等謀以太嘗夏侯玄代帝輔政帝密知之使舍人王羨以車迎豐豐見迫隨羨而至帝數之豐知禍及因肆惡言帝怒遣勇士以刀鑠築殺之逮捕玄緝等皆夷三族三月乃諷天子廢皇后張氏天子以玄緝之誅深不自安而帝亦慮難作潛謀廢立乃密諷永寧太后下令廢天子爲齊王遣使迎高貴鄉公於元城立之公以帝爲相國增邑至四萬戶帝固辭相

國二年正月毋丘儉文欽舉兵作亂矯太后令移檄郡國爲壇盟於西門之外各遣子四人質於吳以請救二月儉欽帥衆六萬渡淮而西帝會公卿謀征討計朝議多謂可遣諸將擊之太嘗王肅及尚書傅嘏中書侍郎鍾會勸帝自行帝統中軍步騎十餘萬以征之倍道兼行召三方兵大會于陳許之郊斬儉傳首京師欽遂奔吳淮南平閏月帝疾篤使弟昭摠統諸軍晉國旣建追尊景王武帝受禪上尊號曰景皇帝文帝景帝母弟帝魏景初三年封新城侯正始初爲雒陽典農中郎將轉散騎嘗侍大將軍曹爽伐蜀

以帝爲征蜀將軍副夏侯玄出駱谷次于興平勸玄旋軍以爲後圖還拜議郎蜀將姜維寇隴右征西將軍郭淮自長安距之以帝爲安西將軍持節屯關中爲諸軍節度淮攻維別將句安於趨久而不決帝乃進據長城南趣駱谷以疑之維懼退保南鄭安軍絕援率衆來降轉安東將軍持節鎮許昌及大軍討王陵帝督淮北諸軍事帥師會于瑱假金印紫綬蜀將姜維又寇隴右揚聲欲攻狄道以帝行征西將軍次長安維燒營而去會新平羗胡叛帝擊破之遂耀兵靈州北虜震讐叛者悉降高貴鄉公立以參定策進

封高都侯毋丘儉文欽之亂大軍東征帝兼中領軍留鎮雒陽及景帝疾篤帝自京都省疾拜衛將軍景帝薨天子命帝鎮許昌尚書傅嘏帥六軍還京師帝用嘏及鍾會策自帥軍而還至雒陽進位大將軍加侍中都督中外諸軍錄尚書事輔政劔履上殿帝固辭不受甘露元年正月加大都督六月進封高都公地方七百里加之九錫又固辭不受二年五月鎮東大將軍諸葛誕殺揚州刺史樂綝以淮南作亂遣子靚爲質於吳以請救七月帝奉天子及皇太后東征徵兵青徐荆豫分取關中遊軍皆會淮北師次於項

又進軍丘頭吳使文欽等將三萬人救誕三年正月誕欽等出攻長圍諸軍逆擊走之初誕欽內不相協會欽計事與恠誕手刃殺欽欽子鴛攻誕不克帝使諸將攻而拔之斬誕夷三族四月歸京師天子命改丘頭曰武丘以旌武功五月進封晉公加九錫進位相國帝九讓乃止景元元年四月天子以帝三世宰輔政非已出情不能安又慮廢辱將臨軒召百僚而行放黜五月戊子夜使冗從僕射李昭等發甲於凌雲臺召侍中王沉散騎嘗侍王業尚書王經出懷中黃素詔示之戒嚴俟旦沉業等馳告於帝帝召護軍

賈充爲之備天子知事泄帥左右攻相府稱有所討太子舍人成濟抽戈犯蹕帝斬濟夷其三族與公卿議立嘗道鄉公爲帝四年天子乃申前命以太原等十郡封帝爲晉公加九錫遣征西將軍鄧艾伐蜀於是徵四方之兵十八萬使艾自狄道攻姜維於沓中雍州刺史諸葛緒自祁山軍於武街絕維歸路鎮西將軍鍾會帥前將軍李輔征蜀護軍胡烈等自駱谷襲漢中艾帥萬餘人自陰平踰絕險至江油破蜀將諸葛瞻於綿竹進軍維縣遂降劉禪又命晉公以相國總百揆於是上節傳去侍中大都督錄尚書之號

咸熙元年三月進爵爲王增封并前二十郡二年八月薨謚曰文王武帝受禪追尊號曰文皇帝武帝文帝長子仕魏累遷中護軍封新昌鄉侯晉國建立爲世子拜撫國大將軍開府副相國咸熙二年五月爲晉王太子八月嗣相國晉王位下令寬刑宥罪撫衆息役十一月初置四護軍以統城外諸軍十一月遂受魏禪

後魏道武皇帝拓拔氏昭成皇帝嫡孫

臣欽若等曰昭成以上事

起立悉具帝

王帝系門始六歲居昭成喪僞秦苻堅使劉庫仁

劉衛辰分攝國事南部大人長孫嵩盡將故民南依

庫仁帝轉幸獨孤部其後七年十月苻堅敗於淮南是月庫仁爲慕容文等所殺以其弟眷攝國部九年庫仁子顯殺眷而代之乃將謀逆

臣欽若等曰將謀逆謂將殺道武

商人王霸知之履帝足於衆中帝乃馳還是時故大人梁蓋盆子六春爲顯謀主盡知其計密使部人穆崇馳告帝乃陰結舊臣長孫捷元他等幸賀蘭部顯使人求帝不及明年正月戊申帝卽代王位于牛川建元登國元年復以長孫嵩爲南部大人以叔孫普雒爲北部大人班敘勲勞各有差二月幸定襄之盛樂息衆課農三月劉顯

臣欽若等曰劉顯卽劉庫仁之子是也

自善無

南走馬邑其族奴真率部來降四月改稱魏王五月車駕東幸陵石護佛侯部帥侯辰乙弗部帥代題叛走諸將請追之帝曰侯辰等世修職役雖有小愆宜且忍之當今草創人情未一愚近者固應趨趨不足追也七月巳酉車駕還盛樂代題復以部落來降旬有數日亡奔劉顯帝使其孫倍斤代領部落是月劉顯弟肺泥率騎掠奴真部落旣而率以來降初帝叔父窟咄爲苻堅徙于長安因隨慕容永以爲新興太守八月劉顯遣弟亢泥迎窟咄以近隨之來逼南境於是諸部騷動人心願望帝左右于桓等與諸部人

川 創業 二 卷之六  
謀爲逆以應之事泄誅造謀五人餘悉不問帝慮內  
難乃北踰陰山幸賀蘭部阻山爲固遣行人安同長  
孫賀使于慕容垂以徵師垂遣使朝貢并令其子賀  
麟率步騎以隨同等十月賀麟軍未至而寇已前逼  
於是北部大人叔孫普維等十三人及諸烏丸亡奔  
衛辰帝自弩山遷幸牛川屯于延水南出代谷會賀  
麟於高柳大破窟咄窟咄奔衛辰殺之帝悉收  
其衆十二月慕容垂遣使朝貢奉帝西單于印綬封  
上谷王帝不納 是歲慕容垂僭稱皇帝於中山自號  
大燕符丕死符登自立於壘東姚萇  
稱皇帝於長安自號大秦慕容  
冲爲部下所殺慕容永僭立也 二年六月征劉顯於

馬邑南追至彌臯大破之顯南奔慕容永盡收其部  
落三年五月北征庫莫奚陸月大破之獲其四部雜  
畜十餘萬七月庚申庫莫部帥鳩集遺散夜犯行宮  
帝縱騎撲討盡殺之十二月西征至女水討解如部  
大破之四年正月襲高車諸部落二月至女水討叱  
突隣部皆大破之五年三月西征次鹿津海襲高車  
袁紇部四月幸意辛山討賀蘭紇突隣紇奚諸部落  
皆大破之九月討吐奴部於囊典河十月討高車豆  
陳部於狼山亦皆破之六年二月遣九原公儀陳留  
公虔等 臣欽若等曰儀  
虔二公皆宗室 西討黜弗部破之七月衛辰

遣子貞力鞬出稠陽塞侵及黑城九月襲五原屠之  
十月北征蠕蠕追及之於大磧南林山下大破之十  
一月貞力鞬寇南部帝討之大破其軍於鐵岐山自  
五原金津南度河次其所居悅跋城衛辰父子奔遁  
擒斬之自河以南諸部悉平八年三月西征侯呂隣  
部四月至苦水大破之八月南征薛于部帥太悉佛  
於三城會其先出擊曹覆帝乘虛屠其城獲其子女  
珍寶徙其民而還皇始元年七月左司馬許謙上書  
勸進尊號帝始建天子旌旗初建臺省置百官封公  
侯將軍刺史太守尚書郎已下悉用文人天興元年

六月丙子詔有司議定國號羣臣曰昔周秦以前世  
君所生之土有國有家及王天下卽承爲號自漢以  
來罷侯置守時無世繼其應運而起者皆不繇尺土  
之資今國家萬世相承啓基雲代臣等以爲若取長  
遠應以代爲號詔曰昔朕遠祖摠御幽都控制遐國  
雖踐王位未定九州逮于朕躬處百代之季天下分  
裂諸華之主民俗雖殊撫之在德故躬率六軍掃平  
中土凶逆蕩除遐邇率服宜仍先號以爲魏焉布告  
天下咸知朕意閏十一月左丞相驃騎大將軍魏王  
儀及諸王公卿士等上表勸進卽皇帝位帝三讓乃



許之

後周太祖文帝宇文氏德皇帝之子

德皇帝事迹全具帝王帝系門

後魏明帝孝昌二年燕州亂太祖始以統軍從爾朱

榮征之先是北海王顥奔梁梁人立為魏主令率兵

入雒魏孝莊帝出居河內以避之榮遣賀拔岳討顥

仍迎孝莊帝太祖與岳有舊乃以別將從岳及孝莊

帝反正以功封寧都子邑三百戶遷鎮遠將軍出兵

較尉万俟醜奴作亂關右孝莊帝遣爾朱天光及岳

等討之太祖遂從岳入關先鋒破偽行臺尉遲菩薩

等及平醜奴定隴右太祖功居多遷征西將軍金紫

光祿大夫增邑三百戶加直閣將軍普泰二年爾朱

天光東拒齊神武留弟顯壽鎮長安秦州刺史侯莫

陳悅為天光所召將軍眾東下賀拔岳知天光必敗

欲留悅共圖顯壽而計無所出太祖謂岳曰今天光

未有二心若以此事告之恐其驚懼然悅雖為主將

不能制物若先說其眾必人有留心進失爾朱之期

退恐人情變動乘此說悅事無不遂岳大喜即令太

祖入悅軍說之悅遂不行乃相率襲長安令太祖輕

騎為前鋒策顯壽怯懼聞諸軍將至必當東走恐其

遠遁乃倍道兼行顯壽果已東走追至華山擒之太

昌元年關西大行臺賀拔岳以太祖爲左丞領岳府司馬加散騎嘗侍事無巨細皆委決焉齊神武旣破爾朱遂專朝政太祖請往觀之旣至并州齊神武問岳軍事太祖占對雄辨齊神武以爲非嘗人欲留之太祖詭陳忠款乃得反命遂星夜就道齊神武果遣追之至關不及太祖還謂岳曰高歡非人臣也逆謀所以未發者憚公兄弟耳然凡欲立大功正社稷未有不因地勢總英雄而能克成者也侯莫陳悅本實庸材遭逢際會遂叨任委旣無憂國之心亦不爲高歡所忌但爲之備圖之不難今費也投控弦之騎不

下一萬夏州刺史斛拔彌俄定勝兵之士三千餘人及靈州刺史曹泥竝恃其僻遠嘗懷異望河西流民紇豆陵伊利等戶口富實未奉朝命今若移軍近隴扼其要害示之以威懷之以德卽收其士馬以實吾軍西輯玄羗北撫沙塞還軍長安正輔魏室此桓文舉也岳大悅復遣太祖詣關請事密陳其狀魏帝深納之加大祖武衛將軍還令報岳遂引軍西次平涼謀於其衆曰夏州隣接寇賊須加綏撫安得良刺史以鎮之衆皆曰宇文左丞卽其人也岳曰左丞吾之左右手也如何可去沉吟累日乃從衆議於是表太

祖爲使持節衛將軍夏州刺史太祖至州伊利望風  
款附而曹泥猶通使於齊神武魏永熙三年春正月  
岳欲討曹泥遣都督趙貴至夏州與太祖計事太祖  
曰曹泥孤城阻遠未足爲憂侯莫陳悅怙衆密邇貪  
而無信必將爲患願早圖之岳不聽遂與悅俱討泥  
二月至于河曲岳果爲悅所害其士衆散還平涼唯  
大都督趙貴率部曲收岳屍還營三軍未有所屬諸  
將以都督寇維年最長相與推維以總兵事維素無  
雄畧威令不行乃謂諸將曰維智能本闕不宜統御  
近者迫於群議權相攝領今請避位更擇賢才於是

趙貴言於衆曰元帥忠公盡節暴於朝野勲業未就  
奄罹凶酷豈唯國喪良宰固亦衆無所依必欲糾合  
同盟復讐雪恥須擇賢者總統諸軍舉非其人則大  
事難集雖欲立忠建義其可得乎竊觀宇文夏州英  
姿不世雄謨冠時遠邇歸心士卒用命加以法令齊  
肅賞罰嚴明真足恃也今若告喪必來赴難因而奉  
之卽大事集矣諸將皆稱善乃命赫連馳至夏州告  
太祖曰侯莫陳悅不顧盟誓棄恩背德賊害忠良群  
情憤惋控告無所公昔居管轄恩信著聞今無小無  
大咸願推奉衆之恩公引日成歲願勿稽留以慰衆

望也太祖將赴之夏州吏民咸泣請曰聞悅今在永  
維去平涼不遠若已有賀拔公之衆則圖之實難願  
且停留以觀其變太祖曰悅既害元帥自應乘勢直  
據平涼而反趨趙屯兵永維吾知其無能為也且難  
得易失者時也不俟終日者機也今不早赴將恐衆  
心自離都督彌姐元進規欲應悅密圖太祖事發斬  
之太祖乃發輕騎馳赴平涼時齊神武遣長史侯景  
招引岳衆太祖至安定遇之謂景曰賀拔公雖死宇  
文泰尚存卿何為也景失色對曰我猶箭耳隨人所  
射安能自裁景於此即還太祖至平涼哭岳甚慟將

士且悲且喜曰宇文公至無所憂矣于時魏孝武帝  
將圖高歡聞岳被害遣武衛將軍元毗宣旨慰勞追  
岳軍還維陽毗到平涼會諸將已推太祖侯莫陳悅  
亦被勅追還悅既附高歡不肯應召太祖謂諸將曰  
侯莫陳悅枉害忠良復不應詔命此國之大賊豈可  
容之乃命諸軍戒嚴將以討悅及元毗還太祖表於  
魏帝曰臣前以故關西大都督臣岳竭誠奉國橫罹  
非命三軍喪氣朝野痛惜都督寇雒等啣冤茹憾志  
雪讐恥以臣昔同幕府苦賜要結臣便以今月十四  
日輕來赴軍當發之時已有列表既為衆情所逼權

掌兵事詔召岳軍人入京此乃爲國良策但高歡之衆已至河東侯莫陳悅猶在永維在此軍士多是關西之人皆戀鄉邑不願東下今逼以上命悉令赴闕悅躡其後歡邀其前首尾受敵其勢危矣臣殞身王事誠所甘心恐敗國殄人所損更大乞少停緩更思後圖徐事誘導漸就東引太祖志在討悅而未測朝旨且兵未集假此爲詞因與元毗及諸將刑牲盟誓同獎王室魏帝詔太祖曰賀拔岳旣殞士衆未有所歸卿可爲大都督卽相統領知欲漸就東下良不可言今亦徵侯莫陳悅士馬入京若其不來朕當親自

致罰宜體此意不過淹留太祖表曰侯莫陳悅違天逆理酷害良臣自以專戮罪重不恭詔命阻兵永維強梁秦隴臣以大宥旣班恐抑私憾頻問悅及都督可朱渾元等歸闕早晚而悅竝維繫使人不敢反報觀其指趣勢必別圖臣正爲此未敢自拔兼順衆情乞少停緩太祖乃與悅書責之曰頃者正光之末天下沸騰塵飛河朔霧塞荆沔故將軍賀拔公攘袂勃起志寧寓縣援戈南指拯皇靈於已墜擁旌西邁濟百姓於淪胥西顧無憂繫公是賴勳伐茂隆遂征關右此乃行路所知不藉一二談也君實名微行薄本

無遠量故將軍行遷喬之志篤彙征之理乃申啓朝  
廷薦君爲隴右行臺朝議以君功名闕然未之許也  
遂頻煩請謁至於再三天子難違上將便於聽許是  
亦遐邇共知不復煩之翰墨縱使木石爲心猶當知  
感況在生靈安能無愧加以王室多故高氏專權王  
上虛心寄隆晉鄭君復與故將軍同受密旨屢結盟  
約期於畢力共戡時難而貌恭心狠妬勝嫉賢口血  
未乾七首已發協黨固賊共危本朝孤恩負誓有覲  
面目豈不上畏於天下慙於地吾以弱才猥當藩牧  
蒙朝廷拔擢之恩故荷將軍國士之遇聞問之日魂

守驚馳便陳啓天朝變來奔赴衆情所推遂當戎重  
比有勅旨召吾還闕亦有別詔命君入朝雖操行無  
間而年齒已宿今日進退唯君是視君若督率所部  
自山隴東邁吾亦摠勒師徒北道還闕其追蕪藺之  
迹同慕寇賈之風如其首鼠兩端不時奉詔專戮違  
旨國有嘗刑枕戈坐甲指日相見幸圖利害無貽噬  
臍悅旣知太祖謀已詐爲詔書與秦州刺史万俟普  
撥令與悅爲黨授普撥疑之封詔以呈太祖太祖表  
之曰臣自奉詔總平涼之師責重憂深不遑啓處訓  
兵秣馬唯思竭力前以人戀本土侯莫陳悅窺窬進

退量度且宜任此今若召悅授以境內官臣列旆東  
轅匪朝伊夕朝廷若以悅堪爲邊扞乞處以瓜涼一  
藩不然則終致猜虞於事無益初原州刺史史歸爲  
岳所親任河曲之變反爲悅守悅遣其黨王伯和成  
次安將兵二千人助歸鎮原州太祖遣都督侯莫陳  
崇率輕騎一千襲歸擒之并獲次安伯和等送於平  
涼太祖表崇行原州事万俟普撥又遣其將北干保  
維領二千騎來從軍三月太祖進軍至原州衆軍悉  
集諭以討悅之意士卒莫不懷憤太祖乃表曰臣聞  
誓死酬恩覆宗報主人倫所急赴蹈如歸自大都督

臣岳歿後臣頻奉詔還闕秣馬戒途志不俟旦直以  
督將已下咸稱賀拔公視我如子今讐恥未報亦何  
面目以處世間若得一雪冤酷萬歿無恨且悅外附  
強臣內違朝旨臣今上思逐惡之志下遂節士之心  
興伏天威爲國除害小違大順實在茲辰克定之後  
伏待斧鉞四月引兵上隴留兄子遵爲都督鎮原州  
太祖軍令嚴肅秋毫無犯百姓大悅識者知其有成  
軍出木峽關大雨雪平地二尺太祖知悅怯而多猜  
乃倍道兼行出其不意悅果疑其左右有異志者左  
右亦不自安衆遂離貳聞大軍且至退保畧陽留一

萬餘人據守永雒太祖至永雒命圍之城降太祖卽  
率輕騎數百趨畧陽以臨悅軍悅大懼乃召其部將  
議之皆曰此鋒不可當勸悅退保上邽以避之時南  
秦州刺史李弼亦在悅軍乃間道遣使請爲內應其  
夜悅出軍中自驚潰將卒或相率來降太祖縱兵奮  
擊大破之虜獲萬餘人馬八千匹悅與其子弟及麾  
下數十騎遁走太祖曰悅本與曹泥應接不過走向  
靈州乃令原州都督遵邀其前都督賀拔穎等追其  
後遵至牽屯山追及悅斬之太祖入上邽悅府庫財  
物山積皆以賞士卒毫釐無所取左右竊一銀鏤甕

以歸太祖知而罪之卽剖賜將士衆大悅時高歡已  
有異志故魏帝深仗太祖乃徵二千騎鎮東雍州助  
爲聲援仍令太祖引軍而東太祖遣大都督梁禦率  
騎步五千鎮河渭合口爲圖河東之計遂入雍州魏  
帝進太祖侍中驃騎大將軍開府儀同三司關西大  
都督畧陽縣公尋尚書授僕射關西大行臺時魏帝  
方圖齊神武太祖乃傳檄方鎮曰蓋陰陽通用盛衰  
相襲苟當百六無問三五皇家創曆陶鑄蒼生保安  
四海仁育萬物運距季末屯沴屢起隴冀騷動燕河  
狼顧雖靈命重起蕩定有期而乘釁之徒因生羽翼



賊臣高歡器識庸下出自輿阜罕聞禮義直以一介  
鷹犬効力戎行靦冒恩私遂階榮寵不能竭誠盡節  
專挾姦回乃勸爾朱榮行茲篡逆及榮以專政伏誅  
世隆以凶黨外叛歡苦相敦勉令取京師又勸吐萬  
兒復與弒雲暫立建明以令天下假推普泰欲竊威  
權企歸廢斥俱見酷害於是稱兵河北假討爾朱復  
通表奏云取讒賊旣行廢黜遂將篡弒以人望未改  
恐鼎鑊交及乃求宗室權允人心天方與魏必將有  
主劫戴聖明誠非歡力而歡阻兵安忍自以爲功廣  
布腹心跨州連郡端揆禁闕莫非親黨皆行貪虐窳

窳生人而舊將名臣正人直士橫生瘡痍動挂網羅  
故武衛將軍伊琳清貞剛毅禁旅攸屬直閣將軍鮮  
于康仁忠亮驍傑瓜牙斯在歡收而戮之曾無聞奏  
司空高乾是其黨與每相影响謀危社稷但以姦志  
未從恐先洩漏乃密白朝廷使殺高乾方哭對其弟  
稱天子橫戮孫騰任祥歡之心膺竝使入居樞近伺  
國間隙知歡逆謀將發相繼逃歸歡益加撫待亦無  
匡白然歡入雒之始本有姦謀令親人蔡雋作牧河  
濟厚相恩贍以爲東道主人故關西大都督清水公  
賀拔岳勲德隆重興亡攸寄歡好亂樂禍深相忌毒

乃與侯莫陳悅陰圖陷害幕府已受律專征便即討戮歡知狀已露稍懷旅拒遂遣蔡雋拒伐令竇泰佐之又遣侯景等云向白馬輔世珍等徑趣石濟高隆之疋婁昭等屯據壺關韓軌之徒擁衆蒲坂於是上書天子數論得失訾毀乘輿威侮朝廷藉此微庸與茲大寶谿壑可盈禍心不測或言徑赴荆楚開疆於外或言分詣伊維取彼讒人或言欲來入關與幕府決戰今聖明御運天下清夷百寮師師四隩來暨人盡忠良誰爲傾側而歡威福自巳生是亂階緝搆南箕指鹿爲馬包藏凶逆伺我神器是而可忍孰不可

忍幕府折衝宇宙親當受朕銳師百萬穀騎千群爨糧坐甲唯敵是俟義之所在糜軀匪恡况頻有詔書班告天下稱歡逆亂徵兵致伐今便分命將帥應機進討或趣其要害或襲其窟宅電繞蛇擊霧合星羅而歡違負天地毒被人鬼乘此掃蕩易同俯拾歡若渡河稍逼宗廟則分命諸將直取并州幕府躬自東轅電赴伊維若固其巢穴未敢發動亦命群帥百道俱前輾裂賊臣以謝天下其州鎮郡縣率土黎人或州鄉冠冕或勳庸世濟竝宜捨逆歸順立効軍門封賞之科已有別格凡百君子可不勉歟七月魏帝從

雒陽率輕騎入關太祖備儀衛奉迎謁見東陽驛乃奉命都長安披草萊立朝廷軍國之政咸取太祖決焉仍加授大將軍雍州刺史兼尚書令進封郡公尚馮翊長公主拜駙馬都尉閏十二月魏孝武帝大漸太祖與群公定策尊立南陽王寶炬爲嗣是爲文帝大統元年進都督中外諸軍錄尚書事封安定郡王太祖固讓改封郡公三年正月東魏寇龍門屯軍蒲坂造三道浮橋度河又遣其將竇泰趣潼關太祖縱兵擊破之盡俘其衆斬泰首高歡徹橋而遁是年八月丁丑太祖率李弼獨孤信梁禦趙貴于謹若干惠

怡峰劉亮王德侯莫陳崇李遠達奚武等十二將至潼關太祖乃誓於師曰與爾有衆奉天威誅暴亂惟爾衆士整爾甲兵戒爾戎事無貪財以輕敵無暴民以作威用命則有賞不用命則有戮爾衆士其勉之于謹徇地至盤豆降東魏將高叔禮及戍卒一千戊子至弘農于時連雨太祖乃率諸軍冒雨攻之庚戌城潰斬陝州刺史李徽伯虜其戰士八千擒將高干竝送長安於是宜陽邵郡皆來歸附十月壬辰破高歡於沙苑斬六千餘級降者二萬餘人歡夜遁追至河上復大克獲前後虜其卒七萬留其甲士二萬餘

悉縱歸收其輜重兵甲獻俘長安還軍渭南於是所徵諸州兵始至乃於戰所令當時兵士人種柳一株以旌武功魏帝進太祖柱國大將軍四年七月東魏遣其將侯景庫狄干高敖曹韓軌可朱渾元莫多婁貸文等圍獨孤信於雒州八月庚寅太祖至穀城莫多婁貸文可朱渾元來逆臨陣斬貸文元單騎遁免悉虜其衆遂進軍瀍東景等北據河橋南屬邙山爲陣與諸軍合戰斬高敖曹及其儀同李猛西兗州刺史宋顯等虜其甲士萬五千赴河死者萬數六年春侯景出三鵝將侵荊州太祖遣開府李弼獨孤信各

率騎五千出武關景乃退還夏茹度河至夏州太祖召諸軍屯沙苑以備之八年冬高歡侵汾絳圍王璧九年春度河據邙山十二年春侯景侵襄州九月高歡圍王璧太祖皆破走之十三年正月歡卒子澄嗣與侯景有隙景舉河南十六州東附七月景叛歸于梁十四年正月進授太祖太師十五年六月梁竟陵郡守孫暲舉郡來附時侯景圍建業司州刺史柳仲禮帥兵赴援及景克建業仲禮還司州率衆來寇暲以郡叛十一月太祖遣開府楊忠率兵與行臺僕射長孫儉討之攻克隨郡忠進圍仲禮長史馬岫於安

陸十六年正月擒仲禮悉擄其衆馬岫以城降十七年三月魏文帝終太子嗣位太祖以冢宰摠百揆十月太祖遣大將王雄出子午伐上津魏興大將軍達奚武出散關伐南鄭明年去年號稱元年是年春王熊平上津魏興以其地置東梁州夏四月達奚武圍南鄭月餘梁州刺史宜農侯蕭循以州降武執循還長安二年三月遣大將軍魏安公尉遲迥率衆伐梁武陵王蕭紀於蜀夏四月太祖勒銳騎三萬西踰隴度金城河至姑臧吐谷渾震懼遣使獻其方物五月蕭紀潼州刺史楊乾運以州降引迥軍向成都七月

太祖自姑臧至于長安八月克成都劔南平三年春魏帝有怨言太祖與公卿定議廢帝尊立齊王廓是爲恭帝元年七月梁元帝遣使請舊圖以定疆界又連結於齊言辭悖慢太祖曰古人有言天之所棄誰能興之其蕭繹之謂乎十月壬戌遣柱國于謹中山公護大將軍楊忠韋孝寬等步騎五萬討之十一月癸未師濟於漢中山公護與楊忠率銳騎先屯其城下據江津以備其逸丙申謹至江陵列營圍守辛亥進攻城其日克之擒梁元帝殺之并虜其百官及士民以歸沒爲奴婢者十萬餘其免者二百餘家立蕭

答爲主居江陵爲魏附庸三年正月行周禮建六官以太祖爲太師九月太祖有疾十月乙亥大漸殂于雲陽宮十二月閔帝受魏禪追尊爲文王廟曰太祖武成元年追尊爲文皇帝

閔帝太祖第三子魏恭帝三年三月命爲安定公世子四月拜大將軍十月嗣位大冢宰十二月魏帝以岐陽之地封帝爲周公遂受魏禪

册府元龜

